



Abau SALT



THE SALT PROJECT

TABLE OF CONTENTS

	<u>Page</u>
LESON 1 - Okar-ok kokwe hromkwe penkin pawk irway ey so?	1
LESON 2: God Hiykwe hreme uron-pi ko-ar nuw-wak, aio yaprue se hieyn.	4
LESON 3: God Hiy penkin lwak e	8
LESON 4: God so weynpaweyn hom non	12
LESON 5: Yerki, hrom God so wayh ihey-ar lwak ey hiy non	15
LESON 6: God hiykwe hremekwe meyk non se monhre, seyr Hiykwe hremekwe po nak-owok opruw meyamey.	19
LESON 7: God Hiykwe hremekwe sow-mawk sehe kow, payhokuaw hiykwe hreme uron-pi ko-ar lwak	22
LESON 8: Poup hokwe posokwaw so? Hiykwe mey mokwe penkin meio o?	26
LESON 9: Hromkwe yor piaparaw mokwe panoke mon o?	30
LESON 10: Hromo yor piaparaw mo ayay	32
LESON 11: Hromkwe God so maym kokwe huonok prosue mey mon lira	34
LESON 12: Huonok prosue mey kokwe pay so?	37
LESON 13: Kristen homkwe meir penkin non lwak e?	40
LESON 14: Hromo awia se akre akre ha yerki hiy non	43
LESON 15: Hai, hromkwe pekney-weys-aw payhokuaw lwak e?	46
LESON 16: Yerki, hrom kyai piaparaw me lokriy ha ey	49
LESON 17: Hromkwe har mo yor me payhokuaw lorionay kow e?	53
LESON 18: Yerki ipey-aio o, ney o, hom kristen me hieyn ma lwayr hom non	58
LESON 19: Hwon God so ok mesor kow ankin, hunkwe enkin kwa lonhan koruay	61

SALT COURSE

LESON 1 - Okar-ok kokwe hromkwe penkin pawk irway ey so?

Uron ipey-ar: Uwrsa lowpwarowp homkwe hom pay me nan-kiykiy-ay e, hmo lwayr yor mokwe seyr liyliy-aw senkin lwayr. Unsaney har homkwe ok-ar sokukwe nonkway, sawk har homkwe nonkway lwak pey. Hromo lwayr yor hom God so ok-ar ok ke-aw nyay-nyay ey hokwe, hrom pay me nanpanan kiykiy-ay e, God so ok ke nion kwa mon ir. Unsaney ki erey suko mo weynpaweyn piap-araw mon ma lanio lopa hokwe, Jisas hiykwaw-aw.

1 Okar-ok kokwe posokwaw nanpanan kiykiy-ay ey so? Seyr, okrei-ok mokwe posokwaw nanpanan kiykiy-ay ey so?

- 1.1 Uwrsa God se ma nanpanan kiykiy-ay lopa homkwe okrei-ok senkin senkin me nanpanan kiykiy-ay. (Rom 1:18; 2 Tes 2:9-11; Ps 14:1)
- 1.2 Pol hiykwe Kristen-uwrsa Kolosi ko mokwe mo sehe me kraipakrai, hme iwar mo mawkhow ihey-ar senkin senkin hom mon warei-arei okin lor-a-lor swakreik ha ame. Payhokuaw, kristen homkwe seyr okrei-ok me liy pyay. (Kol 2:8, 1 Jon 2:26)
- 1.3 God so uron ko-ar hokwe senkin, uwrsa homkwe Hye kokwe Niohney non o, okar-ok non o, sohom non kampueys me ihey e. (Jon 4 23-24)
- 1.4 Hromo kristen mo nanpanan kiykiy-ay yor, hom krai lwak nonay nonay ie ankin, hromo okrei-ok senkin senkin me nanpanan kiykiy-ay yor o, hrom God se ma nonkway popriy pa ma lwak o, somokwe pau God so okar-ok hok swahya sow ha. (Kol 1:10, 2 Pit 3:18)
- 1.5 Kristen homkwe okar-ok ke Baibel mon kwa nuw-pawk popriy. Okar-ok hromo okrei-ok me swahya sow ey o, hrom God se nonkway popriy pa ma lwak o, somokwe mo Baibel monaw lirway.



2 Seyr homkwe okar-ok ke nonkway ey, sa okar-ok sokukwe hme hrorsay preisia hrahra ha ey. Jon 8:32

- Unsaney ma nanpanan kiykiyay lopa somokwe po lway pruw-ma-pruw, payhokuaw homkwe okrei-ok me nanpanan kiykiy-ay.
- Kristen homkwe okrei kraiar me senaw nakruok pyay, sa okrei somokwe hme liy lway pruw-ma-pruw prosue.
- Kristen krai ma lwak seyn, okrei-yor me senaw nakruok pyay. Hakamay Jisas hiykwaw-aw, honsi lopa hokwe.

3 Okar-ok me God so ok mon pawk irway mey kokwe, ipey-ar. Payhokuaw, hromo nonkway arian non meio mokwe aiai yaprue me leip pey.


Meyk	→	now	→	now-i
Makwey ko arian	→	yor me lahan iaup	→	yor me meio ousne

- 3.1 Now so i hiy penkin leip e, suw mo now sohiy so meyk se nyay-nyay. Seyr liyliy-aw, hromo lwayr-yor hom penkin lwak e, somokwe hromo God se nanpanan kiykiy-ay yor me nyay nyay.
- 3.2 Yeyk hokwe kreys non. Ok-ar me nanpanan kiykiy-ay yor o, okrei me nanpanan kiykiy-ay yor o, hoho aiai mokwe irweyk irweyk-aw leip sawan kreik.



3.2.1 Hromkwe unsaney, hmo lwayr-yor piap eyn ma lwayr me papo lira. Homkwe homkiaw-ayay nuw-mon piapay, seyr uwrsa har, hmo ohriar mon ma non-wak seme nak-mon piapay. (Now irayh ko so owhnan se kwa lira.)

3.2.2 Hrom kristen lwak ankin, hromkwe okrei-ok kraiar me nanpanan kiykiyay nonaw lwak. God hiy uwrsa me penkin hiy mon e, seyr hiy penkin God lwak e, hromkwe okrei-ok kraiar me nak-nanpanan kiykiy-ay. (Now ompok ko so owhnan se kwa lira)



3.2.3 Kristen, krai ma lwak hiykwe hyo okrei kraiar mokwe ok-ar non po swahya sow ha, hiy God so ok ke ma lira mesor popriy so yerki nonaw. Sawk hyo okrei har mokwe seyr lwak me. Hiykwe God so ok-ar-ok non kwa swahya sow lowpway (Now sayar ko so owhnan se kwa lira). Unsaney prueyn nonkway mnow-mnow-aw non, seyr okrei-ok lopa non, hokwe korey lwak pey. Okrei-ok lopa hokwe, God Hiywaw-aw.

4 Uwrsa prueyn prueyn-aw hom hmo lwayr yor me yaprue nonaw kankoum ankin, seyr hmo lwayr-yor yaprue somokwe yier se liy mon kankoum.

- Unsaney prueyn se kokwe ok-ihey hok mon kankoum.
- Hiykwe ok-ihey sokwe uwrsa har me mahiy-sor, Hakamay se-aw pyay e, ok-ar-ok ko yerki lowpwarowp nonaw. Sohokwe ki-wayh ma mon wak se ma me hiy non. (Matt 28:18-20)

- Ki-wayh homkwe har hom Hakamay se pyay e ma-sahre hiy-mon.
- 5 Ok eme lira mesor nok, mesopok me ma-sahre onuayk me: Jon 8:32; Jon 14:6, Hosia 4:6; Galesia 5:7-10; Jon 8:44-45**
- God so ok omokwe 'ok-ar' kokwe penkin me o?
 - Hakamay Jisas se ma nonkway hokwe, pay se me o?
 - Hai, hno lwayr yor hokwe irweyk-eyn penkin lwak ey so, hwon ok sokwe ma lira mesor se hokuaw kokwe.
- 6 Okar ko meyk-ar kokwe senkin:**
- *Okar kokwe omeme-arar me me kumay kow popriy.*
 - *Okar kokwe omeme hom penkin nuw-wak e, sohiy non.*
- 7 Baibel kokwe ipey-ar.**
- Baibel ke yaprue nonaw lira mesor hokwe, ipey-ar. Hromkwe senkin lon ankin, hromkwe okar-ok ke pa nuw-nonkway popriy.
- Hwon mon sorasor ey hokwe, kwa lohnan naruok koruay (Kristen Beria ko me hieyn). (Aposel 17: 10-11)
 - Yaprue nonaw kwa lanio (mey-uwr yaprue, okar-ok ke ma hiymon-sorasor me-sorasor se hieyn). (2 Timoti 2:15)
 - Baibel hokwe krai lowpwarowp non. (Ok lowpwarowp Baibel mon ma lwak somokwe God so mon le).
 - 2 Timoti 3:16-17 ke kwa lira mesor.
 - Hnekwe Niohney Pekneyweys hiy hiymon ey ("Sawk enekwei okar-ok me lohruw-a Niohney hiy le ankin, hiykwe hme kokwe okar-ok lowpwarowp me-aw hiy-anok anok mon sorasor ey." Jon 16:13)
 - Kristen yaprue, mey yaprue ma meio me pawk irway nok, hme hiymon sorasor, sa hom uwsa har me ka mahiy-mon sorasor. (2 Timoti 2:2)
- 8 Mawkhow-ihey-ar.**
- Hunkwe God so okar-ok ke nonkway ankin, hunkwe hno lwayr yor mon kwa nak-anio meio lunlun. God so okar-ok ke mey nak-meio lopa hokwe, hunkwe hunkiaw-ayay mon maw-maw kuayk.

- 8.1 Mawkhow ihey-ar hokwe God so okar-ok ke hno lwayr yor mon mey ma nak-anio meio hiy non.
- 8.2 Jisas hiy uwr nonkway non o, uwr nonkway lopa o, seme Matyu 7:24-27, serey ma lohruw-a me kwa lira mesor.


LESON 2: God Hiykwe hreme uron-pi ko-ar nuw-wak, aio yaprue se hieyn.

Uron ipey-ar: God hiy hromo aio ma lwak se hokuaw, hiykwe hreme sehe hiwayr ira kraipakrai. Sohokwe hromkwe kwa nuw-nonkway popriy. Omeme, hrom ma kiy-mon sorasor omokwe, hremekwe seme kiy-mesair kow kumay popriy ey. Seyr God so uron hiy hyo ney mo ohriar le e ma nuw-iekuw se mesair kow. Seyr God hiykwe hromo aio ki ko mo mey me hreme owhnan me hieyn mesair e nan. Hromo aio homkwe hremekwe Aio God hiy penkin lwak e, seme mesair kow. Sawk aio ki ko homkwe yor piap-araw non. Sawk hmo yor piaparaw homkwe hrom God se penkin nan e, seme liy kamakoum. Sei, sa hromkwe Aio God so weynpaweyn mokwe yaprue nonkway popriy pa seme lwak. Sei, hromkwe hrom God se irweyk-aw ma nuw-nan naway naway nok me ma-mon now-a-now e. Hromo uron senkin somokwe okrei-ok me hieyn. Hromkwe okrei-ok mokwe lesion peyr ko mon po lohruw-a hain.

1 Aio God hiykwe hremekwe uron-pi ko-ar aiopey hay nuw-wak (Owhnan aiopey hay 2a)

Lira mesor: 1 Jon 3:1; Jon 15: 9-10,12

Me nonkway: Owhnan aiopey hay mamey erey suko mokwe uron so owhnan se mesair, omeme irweyk kreysyar se memeir ey hokwe. Owhnan aiopey hay 2a mon kokwe uron so owhnan hokwe uron-pi ko-ar yor se memeir. Owhnan aiopey hay 9a o, 9b o, uron so owhnan hokwe unsaney mo uron se memeir.



2 Aio so mey

Aio hiykwe ney me hiymon sorasor. Hiykwe Aio God hiy penkin lwak e, ney me mesair kow.

Lira mesor: Efesus 6:4; 1 Tesalonaika 2:10-12; Lo 6:7

3 Aio o, ipey o, hoho prueyn hokwe owhnan piaparaw liy lwak.

(Me nonkway ok: Peyrmawk kokwe hromkwe peyr Hakamay se huonok yiawriy. Peyr hromkwe God se kokwe peyrmawk liarok uwr ki erey suko me hieyn lira. Hromkwe senkin nanpanan, God so krai hokwe, peyrmawk liarok uwr mo krai se hieyn. Sawk God se senkin ma nanpanan sohokwe yaprue korey. Sohiy so hokuaw kokwe hromkwe God se ipan kwa lon, hromo uron ko naway ma lwak seme ka mon popriy kow. Sohiy so meyki hokwe enekwei sankaw sankaw, hromkwe God se yaprue liy nonkway nonay nonay ie. Sa hromkwe God hiy posokwaw nuw-wak e, sehe pawk irway ey.)

Erey mon kokwe hromkwe aio ki ko mo yor iha-ih-a-w me mey-a-mey. Senkin peie nanpanan o, God so yor mokwe aio iha-ih-a-w ki ko mo yor me hieyn.


- 3.1 Aio kasaw hohuaw uwri ipey-ar: Aio senkin lwak ankin, hromkwe sa senkin nanpanan, hiykwe enekwei enekwei hreme kar ley pey.
- 3.2 Ipan ipan-aw lon aio: Aio senkin lwak ankin, hromkwe sa senkin nanpanan, hiykwe hremekwe omeme lowpwarowp me kow ey. Mo enekwei hrom omeme kamon ohna lwak pa lwak hi, seyr omeme piaparaw hi, hiykwe hreme kow.
- 3.3 Ney me nion non-ondiy-ay ondiy-ay aio korey: Aio senkin lwak ankin, hromkwe sa senkin nanpanan, hiykwe enekwei lowpwarowp mokwe mey meio. Hiykwe hromo low me lonuayk ey hokwe, seyr hrom ohna pay me lwak e, hiykwe liy hiymon ley.
- 3.4 Aio senkin ma nan, hyo ney lowpwarowp homkwe luwluw-aw nuw-wak e: Aio senkin ma nan sohokwe, senkin lwak ankin, hromkwe hye kar mon ey ey hokwe, honon honon nuw-wak ey.

4 Hromkwe God hiy posokwaw nuw-wak e, sehe pawk irway ey.

Homkwe senkin peie nan o, hromo aio ki ko mo kyai o, hmo weynpaweyn o, aio God so yor me hieyn. Homkwe senkin nan ankin, hunkwe God se kokwe uron yaprue nanpanan pey, payhokuaw, God so kyai mokwe irweyk-aw. Okrei-ok, hromo uron mon ma lwak somokwe, hromkwe God so ok ke lira mesor popriy yerki non liy mon say. (Owhnan aiopey hay 2b ke kwa lira)

- 4.1 God hiy penkin God nuw-wak e, hromkwe Luk 15:11-32 serey liy lira mesor nonkway.
 - Hiykwe hremekwe uron-pi ko-ar nuw-wak.
 - Hiykwe hromo yor piap-araw me lorionay kow e mon.
 - Hiykwe hreme naruok.
 - Hiykwe kar ley, hrom hromo yor piap-araw me uron lowk ankin.
 - Hiykwe hreme liy lorionay ley.
 - Hiykwe hreme uron lowk.

- 4.2 Rom 8:15 mon kokwe hromkwe hye senkin liy mowie: "Abba". (Ok sohok ko meyk kokwe senkin, "Aio".)



5. Luk 15:11-32 ke kwa lira mesor.

Ok sokukwe aio yaprue so weynpaweyn me mesair kow. Mesopok eme kwa ma-sahre onuayk me:

- Aio sohokwe penkin aio so?
- Hiykwe penkin lon so?

6 Yor irweyk kreysyar

Luk 15:11-32 mon kokwe hromkwe weynpaweyn irweyk kreysyar ke lira, nay-ih hiy ma-lousne menkin. Ney hakamay so yor kokwe irweyk, orih so yor kokwe irweyk. Ney hakamay so weynpaweyn me kwa mesor.

Hunkwe God se penkin nanpanan e, seme kwa mesor:

- God hiykwe kasaw pankaw hohuaw o?
- God so yor ma sakow-akow kokwe, hunkwe piap eyn pankaw lira o?
- God hiykwe seyn ondiay ondiay pey?
- God hiykwe uwrsa lowpwarowp hom luwluw-aw lwak e pankaw me-sasay o?

Uron-pi ko-ar yor Jisas hiy Luk 15 mon ma lohruw-a ke kwa lira. Uron-pi ko-ar yor senkin sohokwe, God so uron-pi ko-ar yor hwon ma nonkway so irweyk pak? Sawk God so uron-pi ko-ar yor hwon ma nonkway so irweyk lwak ankin, sei, Luk 15 ke kwa nuw-ira mesor lowpway. Sohiy so meyki hokwe hunkwe liy nonkway popriy, meyk-ar Jisas hiy okpey seme ma mesor hokwe.

7 God hiykwe hremekwe uron-pi ko-ar aio yaprue se hieyn lwak.

- 7.1 God hiykwe hreme po lahan iaup. 1 Pita 2:9 hokwe senkin me, "*Sawk homkwe uwrsa God hiy ma lahan iaup hom non.....*"
- 7.2 God hiykwe hreme po lway mno. Rom 8:15-17 mon kokwe senkin me, God hiykwe kristen me po linon mno. Sohiy so hokuaw kokwe kristen homkwe uru har omeme lonokyaw ey non. Sohokwe homkwe Krais so lokrue ko kueir lonok-yaw. Homkwe omeme lowpwarowp, Krais hiy ma nak-wayr me nak-wayr.
- 7.3 Uron-pi ko-ar yor hokwe nak-omniy now-a-now. Hibru 12:7-11 hokwe senkin me, hromkwe su lwayr nonaw lwak e. Mo lwayr yor hok honon honon lwak hi, hromkwe su lwayr nonaw lwak e. Lwayr yor senkin somokwe hreme hiymon now-a-now ha, payhokuaw God hiykwe hyo ney-arar mokwe mo hiymon now-a-now.
- 7.4 Hremekwe God hiykwe lira nonaw lwak. (Sam 139:13-16 ke kwa lira mesor). Ok sohok ko kopi kokwe senkin me: ".....*ipey ko ney-owk mon kokwe hane kokwe hwon mon eyr kwawk.*"
- 7.5 Uwsa har homkwe homkiaw-ayay liy hiy-orok ley. Uwsa senkin somokwe God hiy hiymon.(Sam 68:5 ke kwa lira mesor) "*Hiykwe uwsa aio lopa mo aio. Hiykwe hyo hiymon yor kokwe sa sa-win me kow.....*"
- 7.6 God hiykwe hreme seyn lorionay pey. (Aisaia 49:14-16 ke kwa lira mesor) "*Ipey hokwe ney hoko mu se ma la se seyn lorionay pey.....*"
- 7.7 God hiykwe hne kokwe mey non. (Jeremaia 29:11-13 ke kwa lira mesor) "*Hakwe omeme yaprue ihey kraiar hne meio kow ley.....*"
- 7.8 God hiykwe hne kokwe uron kar aiopey hay non nak-ira. (Sefanaia 3:17 ke kwa lira mesor) "...*hiykwe hne kokwe uron-pi ko-ar sosok-aw kor-wak sue ey.....Hiykwe yayh lowk ey, payhokuaw hiykwe hne kar nuw-ey.*"

Me nonkway: *Unsaney homkwe mamey okukwe sokwe mey, uwrsa me hiymon e, hom prueyn prueyn-aw, seyr orhey non, hmo enekwei arian non lira mesor nanpanan mon sorasor e. Sohiy so hokuaw kokwe kopi har mokwe mon sorasor enekwei ohokwe lousne lopa.*

Leson erey mon kokwe, hromkwe meir enkin [] non. Sohokwe senkin mesair, God so ok meir sohiy so ompok mon ma lwak somokwe ohna non nak-kow, hno enekwei arian non lira mesor e. Uwrsa prueyn prueyn-aw, seyr orhey non ok seme lira mesor ankin, homkwe nonkway nuw-wak popriy ey. God so ok meir sohiy so ompok mon ma lwak somokwe hme mahiy-me kraipakrai ey.

*Seyr God so ok ke inopuaw lira mesor ey hokwe, peie lorionay o. Pol hiykwe Timoti se kokwe mo sehe me. (1 Timoti 4:1: "**God so ok ke kwa lira mesor. Hom swa-hokruw ankin, kwa lira mesor, seyr kristen me ok seme pyay e kwa me sasay, seyr hme okar-ok ke kwa hiymon sorasor.**")*

Yop har mokwe hunkwe meir krompri enkin senkin lira (...). Suw senkin mesair kow, Baibel ko ok kokwe kopi-aw mey, mey lowpway pa.

LESON 3: God Hiy penkin Iwak e

Uron ipey-ar: Leson okukwe hromkwe God hiy penkin Iwak e sehe lira ey. Hromkwe Baibel, hok God se penkin lohruw e, seme lira ey. Hiykwe mo senkin-aw Iwak arian, seyr hiykwe limon lopa. Hiykwe omeme lowpwarowp me po monhre. Hiykwe omeme lowpwarowp mo eir mon Iwak. Hiykwe omeme lowpwarowp mokwe nonkway. Hiykwe yop lowpwarowp mon Iwak. Unsaney prueyn hye liy lira ley. God hiykwe uwsa me nan. Seyr sohiykwaw korey, sawk lesong okukwe hromkwe ok-ar kamon Baibel hok God se penkin me e, sokwe mon sorasor ey. Suw senkin, God hiykwe kamon-aw, sawk kopi krompri non. Hiykwe Aio, seyr Ney, seyr Niohney Pekneyweys. Ihey mo mowr-ok non kokwe hromkwe senkin mowie "Trinity". Meyk-ar kokwe senkin: God Krompri. Okar sokukwe kwa nanpanan kiykiy-ay. Uwsa kraiar homkwe ok-ar sokukwe nanpanan kiykiy-ay pey. Sa homkwe God Krompri se kokwe okrei-ok me seme hiymon sorasor.

1 God hiykwe ipey-ar.

God hiykwe uwr ipey-ar. Hromkwe hye lira preir-yay. Hromkwe sohokwe nonkway popriy pa Iwak ankin, hromkwe i mon liy nak-oun.

1.1 Hakamay Jisas hiykwe God so krai se lohruw-a. Matyu 22:29 ke kwa lira mesor.

1.2 Uwsa homkwe uru ipey-ar God se kow.

Uwsa homkwe God se lonyay ankin, homkwe hyo ouon mon Iwak, seyr hye uru ayaw-ar kow. Hromkwe somokwe God so ok erey mon lira mesor: MHO 15:3-4; 1 Timoti 1:17; Rom 11:33-36; Sam 96:5-10; Sam 104:31-33; Aisaia 40:2-18.

1.3 Hromkwe senkin lira, God hiykwe uwr ipey-ar.

Ok eme kwa lira mesor: Mesair Hrahra Ok 1:12-18; Aposel 4:31; Aisaia 6:1-5; Kisim Bek 33:18-23.

1.4 God hiykwe mo senkin-aw Iwak arian, seyr hiykwe limon lopa. (Owhnan aiopey hay 3a)

1.4.1 *Hiykwe mo senkin-aw Iwak arian, seyr hiykwe limon lopa.* Ok eme kwa lira mesor: MHO 22:13; MHO 1:8; Sam 90:2-6; Sam 93:2.

1.4.2 *Omeme lowpwarowp mokwe mo God hiy monhre. God se kokwe unsaney prueyn monhre pa.* Ok eme kwa lira mesor: Kolosi 1:15-16; Jon 1:1-3; Stat 1:1

1.5 God hiykwe limon lopa.

1.5.1 *Hiykwe omeme lowpwarowp mo eir mon Iwak. Hiykwe mey lowpwarowp mokwe liy meio.* "Abram hiy 99 yia Iwak menkin, Hakamay hiykwe hyo inour mon lousne. Hakamay hiy me, "Hakwe God, mey lowpwarowp mokwe hakwe liy meio. Hane nion kwa non-anio, weynpaweyn piaparaw peie mon o." Stat 17:1


- Rom 1:20
- Matyu 19:26

- Owhnan Sokior-Ok Porih ko:
Josua: Josua 10:12-13
Hesekaia: 2 King 20: 9-11
Moses: Kisim Bek 14:21-31
- Owhnan Sokior-Ok Iwon ko:
Luk 8:22-24; Luk 11:14-20; Luk 5:17-26; Aposel 1:8; Matyu 28:18-19

1.5.2 Omeme lowpwarowp mokwe God hiykwe nonkway. Omeme lowpwarowp hrom nonkway e ma mon omokwe, God hiykwe nonkway. Ok eme kwa lira mesor: Rom 11:33-34; 1 Korin 1:25; Hibrus 4:13; Sam 139:17-18.

1.5.3 God hiykwe yop lowpwarowp mon lwak. Hiykwe omeme lowpwarowp mokwe lira, seyr enekwei lowpwarowp mokwe hiykwe yop lowpwarowp mon lwak.

Ok eme kwa lira mesor:
Sam 139:7-12;
Hibrus 4:13;
Jeremaia 23:23-24.
Owhnan Sokior-Ok Porih ko: Jona 1:3; 2:1-2a.



1.6 Uwrsa homkwe God se seyn lira pey. God hiykwe Niohney.

Ok eme kwa lira mesor: Jon 6:46; Jon 1:18; Kolosi 1:15,19; Hibrus 1:3; Jon 4:24.

1.7 God hiykwe uwrsa me nan.

Hiykwe hreme nion non-okin nas-say e mon. hromo mawkworom me nion, seyr hromo lahan iaup kyai me nion, seyr hromo lokin hre yor me nion.

Hiykwe hromo mawkworom mon lwayr ley, seyr hiykwe omeme hrom ma nanpanan kraiay mon lwayr ley, seyr hiykwe hromo lokihre yor mon lwayr ley. Mak 1:11 ke kwa lira mesor.

2. God hiykwe kamon-aw, sawk hiykwe kopi krompri non. (Owhnan aiopey hay 3b ke kwa lira).

2.1 Jisas hiykwe hyo ki-wayh me kokwe uwrsa me linon keyn prouk e me, uru ohom non:

- Aio
- Ney
- Niohney Pekneyweys (Matyu 28:19)

2.2 God hiykwe uwru prueyn-aw, seyr uwru pruompri non.

Baibel hokwe God se kokwe senkin lohruw, God hiykwe uwru prueyn-aw, seyr uwru pruompri non. Yop lowpwarowp Baibel mon ma lwak mokwe mo ok-ar sokwe-aw mey-a-mey. Enekwei lowpwarowp, Jisas hiy hyo orih se ma lohruw hokwe, hiykwe mo ok-ar sokwe nanpanan me. Hibru 1:5-9 mon kokwe Aio God hiykwe hyo Ney se lohruw. Hiykwe Hibru 1:8 mon kokwe senkin me, "Hwon king ma lwak hokwe, God ara, senkinaw-aw lwak peyow peyow ey!....."

Erey mon kokwe Aio God hiykwe Jisas se kokwe God ok me. God hiy ok penkin lohruw e, somokwe hiykwe ok-ar me, sohokwe ipey-ar. Ursa kraiar homkwe okrei-ok hmo makwey ko arian me God Krompri se ursa har me hiymon sorasor. Sa hom senkin ma lon somokwe, homkwe God so ok ke ouon mon kyos-osi ha.

2.3 Sokior-Ok Porih hok God Krompri se ma lohruw hok non.

- Kwa lonuayk, Israel om: Hakamay (Jehova) hromo God (Elohim – Hibru mo ok Elohim sohok ko meyk-ar kokwe senkin: God kraiar) hiykwe Hakamay (Jehova) prueyn-aw (Lo 6:4).
- Sei, God hiy me, "Hromkwe ursa monhre e, owhnan hromkiaw panapan me hieyn." Stat 1:26
- Sa God Hakamay hiy me, "Uwr hiykwe hromo prueyn se hieyn po lohre, weynpaweyn yaprue o, weynpaweyn piap o, nonkway po lwak.." Stat 3:22
- Oue, hromkwe lokumey nok, hmo wouk-ok me mon owk la-pa-la kow, sa homkwe wayh-wayh mo ok mokwe lonuayk nonkway lopa ka lwak." Stat 11:7.
- "Sa hakwe Hakamay so wouk-ok hok senkin me se lonuayk, 'Hakwe pose meha ey so? Hromo woki-ok kokwe posokwaw nakey kow ey so?" Aisaia 6:8

2.4 Sokior-Ok Iwon hok God Krompri se ma lohruw hok non:

2.4.1 Matyu 28:19 mon kokwe Jisas hiykwe senkin me: "Sei, hakwe hme senkin kiy-me, homkwe yier kipay lowpwarowp ko mon kwa ley ney-ney. Ursa lowpwarowp me hano ki-wayh kwa mon wak. Homkwe hme kokwe Aio so uru non o, Ney so uru non o, Niohney Pekneyweys so uru non o, sohom non kwa nak-me prouk. Seyr homkwe ursa me kwa hiynak-mon sorasor, ok lowpwarowp ha hme ma hiy-me seme ka lonuayk pyay." Ok sokwe Aisaia 48:11 ke nion kwa lira mesor ir.



Uru ayaw-ar God se kow ey hokwe, unsaney prueyn so korey. Jisas hiykwe Aio so uru non o, Ney so uru non o, Niohney Pekneyweys so uru non o, sohom non prouk e me. Somokwe God Krompri so kopi hom non. Ok 'uru non' hokwe unsaney sohiy so hiy-wayr krai o, hyo weypaweyn o, seme mesair.

2.4.2 Jisas se ma prouk hokwe, Aio o, Niohney Pekneyweys o, hohkwe siraw lwak. Hom krompri-ar kokwe siraw-aw lwak. Matyu 3:16-17.

2.4.3 Jon sapta 13 o, 14 o, Jisas hiykwe God Krompri se lohruw-a.

- Jisas hiykwe senkin me, hiykwe pa ley. Seyr hiykwe senkin me, hyo ki-wayh homkwe hye liy pyay ha ley. (Jon 13:36)
- Filip hiy me, 'Aio se hreme mesair kow e'. Jisas hiykwe sa senkin lonuayk me: Hane posokwaw lira nonkway e, hiy seyr Aio se nak-ira nonkway. (Jon 14:8-9)
- "Hakwe Aio se mesopok ley, hiykwe hme kokwe uw, hme hiymon ey se ka meha. (Jon 14:16-17)
- Jisas hiykwe hme senkin mekow, "Niohney Pekneyweys, hme hiymon-uwr sohokwe Aio hiykwe hano uru non meha ey. (Jon 14:26)
- ".....hromkwe (Jisas o, Aio o) hyo owh mon le nok, hye nion non-wayr ok." (Jon 14:23)

Peyr ok, God krompri se ma me somokwe hromo makwey mon kokwe kumay nuw-wak lopa. (a-b) Aio o, Ney o, Niohney Pekneyweys o, homkwe uru irweyk irweyk-aw, sawk homkwe kamon-aw. Niohney Pekneyweys hiy kristen prueyn so uron mon lyawriy ankin, God Krompri mo uw, pruompri-ar homkwe mo serey suhway-aw nuw-wak.

2.4.4 God Krompri hiykwe mey mokwe suhway suhway-aw non-okin nas-say meio, yerki krompri enkin non:

- krai kamon-aw non
- mey, hom ma nanpanan sakon kawk kokwe, kamon-aw.
- uron-pi ko-ar yor kamon-aw non

(Jisas hiykwe senkin me, hiy o, Aio God o, hohkwe kamon-aw.) Jon 17:11, 21-23.

LESON 4: God so weypaweyn hom non

Uron ipey-ar: Hromkwe lesion 3 mon kokwe, God so weypaweyn lowpwarowp mokwe po lira mesor. Sawk hromkwe God so weypaweyn lowpwarowp omokwe, liy pyay meio lowpway ley. Hromkwe uwrsa me nion non-waw-waw ankin, hromkwe God hiy uwrsa me nion ma non-waw-waw senkin non-waw-waw e. 2 Pita 3:18 hokwe hreme senkin mekow, hromkwe hromo Hakamay so maym o, nonkway o, sohom non leyr nonay nonay ie e. Hrom senkin lon ey hokwe, hromo yor mokwe God so yor me hieyn kwa lwak. God so yor kokwe uron-pi ko-ar yor. (1 Korin 13:13; Jems 2:8, Jon 15:12). God so yor me ma nonkway popriy hokwe ipey-ar. Sa yerki sohiy non kokwe hromo nanpanan kiykiy-ay yor homkwe hromo lwayr yor me liy kankoum.

1 God hiykwe uron-pi ko-ar.

- 1.1 God so uron-pi ko-ar yor hokwe mey lowpwarowp hiy ma meio non mesair kow. Jon 3:16-17
- 1.2 Uron-pi ko-ar yor hokwe hunkwe hunkiaw-ayay-aw yaprue hiy-wayr e nanpanan pey, sawk hunkwe uwrsa har hom yaprue liwak e ma nanpanan hiy non. Filipai 2:3-8; 1 Korin 13
- 1.3 God Krompri mo prueyn prueyn-aw homkwe uron-pi ko-ar lwak yor ke mesair kow.
 - Aio: Jon 3:16; 1 Jon 4:10-11; Rom 8:39; 2 Korin 13:14; 1 Jon 2:15.
 - Jisas: Jon 15:9; Efesus 3:17b-19; 2 Korin 5:14; Rom 8:35.
 - Niohney Pekneyweys: Rom 5:5; Rom 15:30; Galesia 5:22.

2 Uwrsa homkwe God so owhnan ke kwa pyay, seyr uron-pi ko-ar lwak yor ke kwa liaup.


Efesus 5:1-2; 1 Korin 13; 1 Korin 16:13-14; 1 Jon 4:8.

3 Yerki, God hiy hyo uron-pi ko-ar lwak yor ke ma mesair kow hom non


3.1 God so kyai ihey-ar

God so uron-pi ko-ar lwak yor uron ouon ko hokwe hyo kyai ihey ihey-ar hom lousne sa-ousne.

- 3.1.1 **God hiykwe ok-ar:** Hiykwe weypaweyn hom penkin lwak e, mo senkin mekow. Jon 14:16-17; Jon 1:14; Jon 8:42-46; Sam 89:34.



- 3.1.2 **God hiykwe mawkhaw ihey-ar non:** Hiykwe hyo nonkway kokwe uron-pi ko-ar lwak yor non nak-meio. Jems 3:17; Mak 6:2; 1 Korin 2:7-8; Jeremaia 51:15.



- 3.1.3 **God hiykwe luwluw-aw:** Enekwei lowpwarowp mokwe God hiykwe weynpaweyn yaprue me-aw meio. Hibrus 1:8-9; 2 Tesalonaika 1:5-7; Rom 2:5; Lo 32:4.
- 3.1.4 **God hiykwe hreme uron lowk:** Uwrsa homkwe God so uron lowk yor hokwe liy lonok ley, payhokuaw homkwe yor piap po nuw-mon, sawk God hiykwe hyo uron lowk yor kokwe mo uwrsa senkin me mesair kow. Efesus 2:4-5; Titus 3:5; Jems 5:11; Sam 86:5
- 3.1.5 **God hiykwe seyn kankoum-a-koum pey:** Hromkwe enekwei enekwei hye-aw nyay-nyay hi. Jems 1:17; 2 Timoti 2:13; Aisaia 49:14-16; 1 Tesalonaika 5:23-24; 1 Korin 1:9.

4. Hromkwe God se mon memeir e.

Efesus 5:1 – Homkwe God hiykiaw ma lwak se, senkin lwak e.

4.1 **God hiykwe yop lowpwarowp mon lwak.**

Hai, kwa nanpanan. Hromkwe God se yerki senkin non liy mon memeir pak aney? Ohow, liy so.

4.2 **God hiykwe omeme lowpwarowp mokwe nonkway.**

Hai, kwa nanpanan. Hromkwe omeme lowpwarowp mokwe liy nonkway pak aney? Ohow, liy so.

4.3 **Hromkwe God hiykiaw ma lwak se, senkin lwak e.**

Hai, kwa nanpanan. Hromkwe Efesus 5:1 kokwe yerki penkin non lonuayk pyay ey ko? Hromkwe God hiy penkin God lwak e, hromkwe hye hieyn-ar liy par-wawk ley, sawk hromkwe God so kyai yaprue ke liy pyay.

5 God so uron-pi ko-ar yor

Krai, God se ma hiy-now-a-now hokwe, hyo uron-pi ko-ar yor hokiaw. God so uron-pi ko-ar yor hokwe God so yor mo ompok mon lwak. God so pekney-weys yor hokwe hyo mawkhaw ihey-ar o, hyo uron lowk yor o, seyr hyo yor yaprue lowpwarowp o, seme nion non-saronay. Seyr hyo yor mokwe seyn kankoum-a-koum pey, seyr hiykwe ok-ar hiykaw. Hyo yor somokwe senkin mesair kow, God hiykwe ihey-ar. God so uron hokwe senkin, hiykwe uwrsa me nion non-waw-waw ley.

Payhokuaw, hiykwe uwrsa me uron-pi ko-ar nuw-wak. Seyr hiykwe uwrsa me nion non-saronay. God hiykwe uwrsa me uron-pi ko-ar nuw-wak, seyr hiykwe pekney-weys. Hyo uron lowk yor o, hiy luwluw-aw ma lwak o, somokwe ipey-ar. God hiykwe yor piap, hrom ma mon me lorionay kow. Payhokuaw, hyo yaprue mokwe hyo yor me nion non-meio wayh-wayh. God so yor mo yaprue homkwe siraw-aw non-meio wayh-wayh, payhokuaw hiykwe pekney-weys, seyr ihey-ar.

6 God hiykwe pekney-weys. 1 Jon 1:5

- 6.1 **Pekney-weys hokwe uron-pi ko-ar yor hok non.** Seyr uron-pi ko-ar yor sokukwe ihey-ar. Jems 3:17.
- 6.2 **Pekney-weys yor hokwe irweyk-aw lwayr.** Hokwe ki ohiy so yor ke nion liy non-waw waw ley. Efesus 4:24
- 6.3 **Pekneyweys hokwe mnow-mnow-aw, seyr noprə noprə lopa.** Efesus 1:4; 1 Pita 1:14-16; (Livai 11:44, 45; 19:2; 20:7, 26); Sam 24:3-4.
- 6.4 **God hiykwe hremekwe pekneyweys lwak e nan,** payhokuaw, hiykwe pekneyweys. Hiykwe hremekwe hye hieyn lwak e nan. Hibru 12:14; Matyu 5:48
- 6.5 **God hiykwe hremekwe hye hieyn lwak e nan, seyr hiykwe senkin po me loray, hiykwe hyo pekneyweys lwak yor ke hromo mon meio ousne ey.** 2 Timoti 2:13; 1 Tesalonaika 5:23-24
- 6.6 **Hromkwe God se nion siraw non-meio, hromo weynpaweyn me kankoum ey hokwe.** Filipai 2:12-13; Rom 8:28-29

Hakamay Jisas hiykwe senkin me, siraw-aw senkin ma non-meio sohokwe honon honon liy lwak ley. (Matyu 11:28-30.)

Sawk hwon o, Hakamay Jisas o, hohkwe yerki kamon-awaw mon lanio nok ankin, now-pay omeme me lway nakey ey kokwe, honon honon liy lwak ley.

LESON 5: Yerki, hrom God so wayh ihey-ar lwak ey hiy non

Uron ipey-ar: Hromkwe God se nion kwa non-iwak, hyo wayh ihey-ar lwak ey hokwe. Hromkwe God se kwa mesopok, seyr God so ok ke kwa lira mesor nanpanan. Leson okukwe hromkwe yerki God so wayh ihey-ar lwak ey se lira ey. Hromkwe hrom God se penkin mesopok e, seyr God so ok ke penkin lira mesor e, seme lira ey.


1 Meyk, God hiy hreme ma monhre hokwe mo sehe: Hyo uron hokwe senkin, hromkwe hyo wayh ihey-ar nuw-wak e.

- 1.1 Jisas hiykwe hiykiaw God so wayh ihey-ar ohriar ma lwak se lohruw-a. Jon 15:13-15, 17; Jems 2:23; Matyu 11:19; Kisim Bek 33:11.

1.2 Jisas so lwayr yor

Hrom Jisas so lwayr yor ke lira mokwe, hromkwe mey, hiy meio ousne e ma le ke lira. Hiykwe Aio so uron ko se meio. Jon 5:19, 30; Jon 8:28; Jon 12:49; Jon 14:10; Mak 1:35.

- 1.3 Homkwe Maria o, Marta o, hoh Jisas so wayh ihey-ar ma lwak me kwa lira mesor. Luk 10: 38-42.



2 Omokwe mey yaprue hreme God so wayh ihey-ar ma mon wak hom non. (Owhnan aiopey hay 5a ke kwa lira)


- 2.1 Hromkwe God se mesopok ankin, suw hromkwe God se nion non-ohruw-a (Owhnan aiopey hay 5b ke kwa lira).

- 2.1.1 Hromkwe hromo uru arian me peie nak-ie o: Matyu 6:5-6

- 2.1.2 Hromkwe okar-ok me-aw lohruw-a e. Ok puraw puraw yiour-yiour non peie nak-ey o: Matyu 6:7

- 2.1.3 Hromo God se mesopok yor mokwe enkin ka lwak: Matyu 6:9-13; Luk 11:2-4.

1. God so uru se nak-ie (ves 9).
2. Peyr hunkwe hno lwayr yor arian me lira soway soway ha, hunkwe yor piap non senaw lwak. Sei, sa uwrsa har me seyn hiy-mesopok (ves 10).



3. Hwon ohna pay se lwak e, God se kwa mesopok, sa hne ka hiyomon (ves 11).
4. God se kwa mesopok, hno yor piap me ka lorionay kow. Hunkwe seyr uwrsa har, hne ma mon piapay me kwa lorionay kow (ves 12).
5. God se nak-me ihey, hiy hno awia-pow se ma lono akre se (ves 13).
6. Hrom God se mesopok ankin, hromkwe ok-ar me-aw lohruw-a. Hromkwe peie nak-hiy hiy o, sawk hromo lwavr yor mon pay homkwaw lwak e, hromkwe lowpwarowp kwa nuw-mesor kow lowpway. Sohokwe ipey-ar. Sohokwe hrom God se nion-aw ma non-waw-waw hiykwaw korey, sawk hromo non-wawwaw yor lowpwarowp mon seyn.

"Hakamay ara, peyr ha ok me lopa, hunkwe nonkway po nuw-wak. Hunkwe hane po awndiy kawk, hano inour mon, hano meyki mon. Hno iha kokwe hano mon po kekie. Hwon hane ma nonkway sohokwe ihey-ar. Hakwe liy nonkway ley. Sohokwe ayaw-ar nuw-wak, sa hakwe liy nekie-kie ley. Hno Niohney se hakan ey hokwe hakwe perey ley ey so? Hakwe hne penkin hakan ey so? Ha Nonkumey mon lie ankin, hunkwe serey lwak. Ha ki ouon mon lokumey ankin, hunkwe seyr serey lwak. Ha ey kaie mon ley, sour-yawpar menki mon ley, ey kuakeyn mon, hno iha kokwe serey lwak. Hno iha kokwe hano puar-now. Hno iha sayar hokwe hane hiyomon.

Hai, ha enkin nan ankin, eym-nawp hokwe hane liy kawk sue, seyr ey-yar hane ma awndiy kawk ohokwe, arawh po lohre a. Sawk ha senkin ma nanpanan sohokwe ok-ar korey, payhokuaw, eym-nawp o, ey-yar o, hohkwe hne kokwe liyliy-aw. Eym-nawp hokwe hne kokwe eym-nawp korey. Arawh hokwe hne kokwe eypok se hieyn-aw lyar.

Sawk hwon, Hakamay ara, hano owh lowpwarowp hokwe hwon monhre. Hano ipey ko ney-owk mon kokwe hane kokwe hwon mon eir ie."
(Sam 139:4-13)

2.2 Yerki, God hiy hreme nion ma lohruw hiy non (Owhnan aiopey hay 5c ke kwa lira):

2.2.1 Hrom God so wayh ihey-ar ma lwak sohiy, hromkwe hye nion sehe non-ohruw, seyr hye sehe lonuayk: Jon 10:27

2.2.2 Omokwe yerki har, God hiy ok hreme nion ma lohruw-a hom non:

1. God so ok, Baibel mon ma lwak hok non. 2 Timoti 3:16-17 ke kwa lira mesor. "Hno ok kokwe hano sune ko lam-ya, seyr yar hano yerki se wayar kow ey." (Sam 119:105)



- 2** *God so niohney hiy hromo mon ma meio hiy non.* Hrom pay me nanpanan e, seyr hrom weynpaweyn me yerki penkin non lira nonkway e, suw yerki kamon God so Niohney hiy hreme nion ma non-meio hiy non. Aposel 8:29
- 3** *God hiykwe hne nion kokwe Kristen-wayh, God se uron-pi ko-ar ma lwak mo woki-ok non liy lohruw.* Aposel 8:34-35
- 4** *Weynpaweyn hromo owh mon ma lousne-sa-ousne sohom.* 1 Korin 16:8-9
- 5** *Mey krai ipey-ar non mokwe hromkwe liy mesor-a-sor popriy ley:* Yerki sohokwe God so ensel hom liy lohruw-a kow. God hiykwe seyr hreme nion kokwe now non liy non-ohruw. Seyr hromkwe owhnan hromo makwey mon liy lira, now ke hieyn. God hiykwe seyr weynpaweyn me liy mon ousne. Senkin somokwe hromkwe liy mesor-a-sor ley. Sawk somokwe meir, God hiy hreme nion ma non-ohruw me senaw mesair kow. Hunkwe weynpaweyn senkin mokwe God so mamey erey mon liy lira mesor.
- Aposel 5:19-20: Ensel hiy aposel Pita se kalabus-a ko se ma kahrer kow ha hiy non.
 - Aposel 10:9-16: God hiykwe Pita se nion non-ohruw-a, now non. Pita hiykwe now sokukwe eypok kamon hiy inaw liwak non lira.
 - Luk 2:9-10: Ensel homkwe Krais se liwak enekwei se lohruw-a kow.
 - Aposel 16:25-30: God hiykwe mey krai ipey-ar non meio, Pol Sailas leys se kalabus-a ko me hrorsay kow ha.
 - Aposel 12:5-11: God hiykwe mey krai ipey-ar non meio, Pita se kalabus-a ko se ma kahrer kow ha hokwe.
 - Aposel 9:3-4: Wouk-ok kamon nonkumey ko hokwe Pol se me.
 - Kisim Bek 3:2: Hakamay so ensel hiykwe Moses so owh mon lousne, sapapruw ya ma loum mon.
 - Namba 22: 28,32: God hiykwe Balam so donki so woki-ok mon lohruw-a.
- 6** Omeme, weynpaweyn, seyr mey hwon meio, lowpwarowp yaprue lwak ankin, seyr ok-ar lwak ankin, hno uron hiykwe hne po mekow a. Hunkwe hrow-so-hrow panoke ma-nanpanan ley. (Filipai 4:6-7; 2 Korin 2:12-13)
- 2.2.3 Hunkwe senkin penkin nonkway o, hunkwe God se po nuw-onuayk popriy: Ok lowpwarowp God hiy ma lohruw-a mokwe, Baibel ke nion liyliy-aw non-wak. Sawk Baibel ke nion liyliy-aw non-wak pa lwak ankin, suw senkin mesair kow, ok somokwe God hiy me pa. Suw hunkwe uron kreys non liy lwak ley. Aposel 17:11; Jems 1:17
- 2.3 Yerki, hrom Baibel ke ma lira mesor mon sorasor hiy non. Suw hromkwe senkin mowie: ***nan koukou-ay*** (owhnan aiopey hay 5a, namba 3 ke kwa lira):
- 2.3.1 Hunkwe Sam 1:1-3 o, Josua 1:8 o, seme kwa lira mesor.
- 2.3.2 Nan koukou-ay hokwe pay so: Hunkwe Filipai 4:8 o, Kolosi 3:16-17 o, seme kwa lira mesor.
- 2.3.3 Hromkwe penkin nan koukou-ay o:

- 1 Niohney Pekneyweys se kwa mesopok, hiykwe ok-ar ke hne ka mesair kow. Hunkwe hye kwa mesopok, sa hiykwe hne kokwe uron kraiar nan koukou-ay ey se ka kow. Ok, hwon Baibel mon ma lira mesor seme kwa nanpanan. Jon 16:13; Jon 5:39
- 2 Hunkiaw-ayay mesopok eme kwa mesopok:
 - Ok okukwe hanekwe God se kokwe penkin kiymesor-asor kow o?
 - Ok har, ha mon sorasor ey mokwe, ok erey pankaw lwak o? Mey har, ha meio ey mokwe, ok erey pankaw lwak o?
 - Ok okukwe hanekwe ok loray pankaw kiy-me loray?
 - Ok okukwe hanekwe me-kupaku ok har pankaw kiy-kow?

2.4 Hunkwe God se lira way nok, nak-kampueys (owhnan 5a, namba 4 ke kwa lira)

- 2.4.1 Meyk hrom God se ma kampueys hokwe ehe: Hromkwe God se seme me ihey, hiy hromo God ma lwak se, seyr mey hiy hreme ma meio kow se.
- 2.4.2 Hromkwe God se kokwe hromo woki-ok nonaw kampueys pey, sawk hromkwe seyr hromo lwayr yor non nak-kampueys. 1 Tesalonaika 5:16-18.
- 2.4.3 Hromkwe God se kokwe hrom uwrsa har me nion weynpaweyn yaprue penkin non non-wawwaw meio e, sohiy non kampueys. Matyu 12:7; Matyu 5:23-24
- 2.4.4 Hrom God se kampueys mokwe, pay hiykwaw lousne o? Hromkwe God se o, uwrsa har me o, uron-pi ko-ar nuw-wak, seyr God so uron ko me pyay meio, seyr God so mey me meio kow.

3. Ow hunkwe enkin liy lon:

- 1 Ok kamon Baibel ko ke liaup nok, hno mesopok ke hieyn God se kwa lira mesor kow. Owhnan ok: Sam 23. Sawk hno mesopok arian ke hieyn-aw kwa nanpanan. Owhnan okukwe Sam 23:1 ko ke lonok. Hunkwe senkin lira mesor "Hakamay hiykwe hano sipsip kow-a uwrt" sawk hunkwe enkin kwa me: God ara, hunkwe hano sipsip kow-a uwrt. Hunkwe hane yaprue hiy-wayr ira. Omeme, ha ohna ma lwak mokwe hunkwe hane kow. Ha lanyan ankin, hunkwe hane lanio pawk. Hunkwe hane hno iha non lway nak-anio, uron-pi ko-ar lwak yor non. Hunkwe hane kraiar-ar nuw-nanpanan, seyr hunkwe hane uron lowk uwrt.....
- 2 Wik kamon kamon-aw mokwe hunkwe omeme hwon God se mesopok ey me kwa mey iawon. Seyr God se nian kwa mesopok, sa hnekwe omeme hwon mesopok ey mokwe hiykiaw ka mesor-a-sor kow. Sei, omeme God hiy hno uron mon ma mekor seme kwa mesopok. Sa God hiy hne penkin ma-sahre onuayk me e, kwa mey-a-mey iawon. Hno mesopok enekwei mokwe, enkin liy meio sakon kawk: Mande: hno uwru saku arian; Tunde: hno wayh-om; Trinde: sios; Fonde: hno kantri; Fraide: kipay lowpwarowp (kipay hno uron hiy ma nan kraiat se mesopok ankin, se sehe).
- 3 Filipai 4:6-7 ke lira mesor nok, nan koukou-ay. God hiy hne penkin me e, mamey mon kwa meyamey.
- 4 Hunkwe mamey kamon, hwon God se uron-pi ko-ar ma lwak se kwa meyamey kow.

Leson 6: God hiykwe hremekwe meyk non se monhre, seyr Hiykwe hremekwe po nak-owok opruw meyamey.

Uron ipey-ar: Leson okukwe hromkwe meyk God hiy hreme ma monhre se lohruw-a nanpanan ey. Seyr hromkwe hrom hyo uron mon aiopey hay pankaw lwak e, seme mesor nanpanan ey. God hiykwe hreme sehe monhre, hromkwe hyo owhnan lwak e. Hromkwe uwrsa senkin, yor yaprue o, yor piap o, seme liy lahan lahan ira nonkway. Hromkwe makworom non, seyr hromo uron arian me pyay kyai non, seyr hrom penkin lokiandre ir e, seme liy mesair. God hiykwe hremekwe senkin sehe monhre, hrom hye nian o, uwrsa har me o, uron-pi ko-ar lwak e.

1 Baibel mon kokwe hromkwe senkin lira mesor:

- 1.1 God hiykwe makworom non (ki o, omeme lowpwarowp serey ma lwak sohom o, seme monhre ey hokwe, mo makworom o, nanpanan yor o, sohom non monhre).


"*Peyrmawk-ar kokwe God hiykwe nonku o, ki o, seme monhre pie.*" Stat 1:1

- 1.2 God hiykwe hyo uron arian se pyay kyai non (hiykwe krai non, yor piap o, yaprue o, seme sor anon ey hokwe)

"*Hakamay hiykwe sa senkin sehe me, 'Hakwe uwrsa hakiaw ki non ma monhre me monsay lowpway ey. Hakwe uwrsa lowpwarowp o, ayay lowpwarowp o, ki ko omokwe nuw-monsay lowpway ey. Hakwe ahney ayaw mon ma sian anio me mon-say lowpway ey. Seyr hakwe ayay lowpwarowp sune-ihha non ma lanio me mon-say lowpway ey. Sawk hakwe uron lowk, hakwe omeme somokwe panoke monhre soney?*" Stat 6:7

- 1.3 God hiykwe hiy penkin lokiandre ir e, hiykwe liy mesair.

"*Sa Hakamay hiykwe, hiy uwrsa me ki mon ma monhre se kar ley pa. Hiykwe kasaw aiopey hay nuw-hohuaw.*" Stat 6:6



2 God hiykwe kwahnaw me.

God hiykwe ey o, yein o, napuar o, ki o, howniy o, souryawp-ar o, ayay senkin senkin o, seme monhre! Hiykwe kwahnaw me, sa homkwe seme lousne-sa-ousne. Stat 1:3-8.

3 Sawk God hiykwe uw se kokwe ki so pow non monhre.

Sei, God hiykwe sa ke monhre, uw so nayh-meyk kamon hyo owh ko se ma kair non. God hiykwe hmekwe yaprue nonaw kor-nuw monhre. Suw hreme senkin mesair kow, uwrsa homkwe God so nene mon kokwe aiopey hay nuw-wak. Stat 2:7; Stat 2:21-22; Stat 1:26.

- 3.1 God hiykwe hreme sehe monhre, hye hieyn-ar lwak e. Jems 3:9

3.2 Uwr o, sa o, homkwe omeme lowpwarowp God hiy ma monhre mo eir mon Iwak. Stat 1:26-28.

4. God hiy uwur se monhre menkin, hiykwe uwur se kokwe mawkworom o, uwur mo uron arian se pyay kyai o, lokiandre ir kyai o, senkin nak-monhre kow hain.

4.1 Mawkworom (*nanpanan kyai*): Filipai 1:9

- 4.1.1 Hromkwe hromo mawkworom non liy nanpanan.
- 4.1.2 Hromkwe omeme iwon hromo mawkworom non liy nanpanan meio ousne-sa-ousne.
- 4.1.3 God hiykwe hreme omeme paraw ko me ma-nanpanan kyai ke kow, hrom mon sorasor e. Sei, sa hromkwe uwrsa har me liy mahiy-mon sorasor, omeme hrom ma mon sorasor somokwe.
- 4.1.4 God hiykwe hreme kokwe ok lohruw kyai non nak-monhre. Sa hromkwe ok iwon honon honon me liy lohruw, uwrsa har me nion.
- 4.1.5 God hiykwe hreme kokwe nanpanan yor uron ko se kow, hreme hiy-anok anok lahan iaup e. Sa hromkwe nanpanan yor uron ko sohiy non liy lahan iaup, weynpaweyn piap o, yaprue o. Rom 2:14-15
- 4.1.6 God hiykwe hremekwe senkin monhre: Enekwei enekwei hromkwe senkin nonkway, God hiykwe sehe ma Iwak se. Hrom hye nonkway ey hokwe, hiykwe piaray sous pa. Rom 1:18

4.2 Hromo uron arian se pyay kyai (hromkwe krai non, yor piap o, yaprue o, seme lahan iaup ey hokwe) Filipai 1:10

- 4.2.1 Meyk-ar kokwe senkin: Hromkwe weynpaweyn hromkiaw mon nakyas ey me liy lahan iaup.
- 4.2.2 Hromkwe mo lahan iaup e, payhokuaw suw hromkwe God se nion o, uwrsa har me nion o, liy non-ondiay ondiay. Matyu 7:7-8

4.3 Lokiandre ir kyai

Hromkwe lokiandre ir kyai non. Enekwei hrom kar ley ankin, seyr enekwei hrom kar ley lopa Iwak ankin hromkwe liy nonkway. Hromkwe kar aiopey hay nuw-ey ankin, hromkwe liy lokiandre ir. Seyr enekwei hrom lowk kworpakwor ankin, hromkwe liy lokiandre ir. Seyr enekwei hrom hok, hrom kasaw hohuaw, hromkwe liy lokiandre ir. Filipai 4:4,7

5 Hromkwe lahan iaup.

Hromo owh mon kokwe hromo mawkworom o, hromo uron arian me pyay kyai o, seyr hromo lokiandre ir kyai o, somokwe siraw-aw non-meio wayh-wayh. Kolosi 3:15 mon kokwe mo sehe me, 'hmo uron mon' kokwe mo lokiandre ir kyai ke lohruw. Seyr kwa lira nonkway, 'mawkhow ihey-ar hokwe' mawkworom non meio ey se me. Ok 'hiyomon sorasor' o, 'me kupaku' o, somokwe hrom hromo uron arian non ma lahan iaup hom non. Kolosi 3:15-16

- 5.1 Hrom unsaney prueyn se uron-pi ko-ar lwak ankin, suw hromkwe unsaney sohiy so yaprue se lahan iaup kow. Sohokwe hromo uron arian me pyay kyai hiy meio. Matyu 22:37-40; Matyu 10:41-42.
 - 5.2 Sa hromo mawkworom o, hromo uron arian non lahan iaup kyai o, lokiandre ir kyai o, sohom non ma lwak hokwe, hromkwe yerki kreys non: Hromkwe God se liy lahan iaup, seyr hromkwe God se liy me-puar.
- 5.2.1 Hromkwe God se liy me-puar. Rom 1:21
 - 5.2.2 Hromkwe seyr Jisas Kris se nanpanan kiykiy-ay e liy lahan iaup. Rom 3:23
- 5.3 God hiykwe uwur o, sa o, ki o, seme meir liy-liy-aw nonaw lira anon anon. Galesia 3:26-29

6 Meyk, God hiy hreme ma monhre hiy non:

- 6.1 God hiykwe hremekwe sehe monhre, hrom hye o, uwrsa har me o, uron-pi ko-ar lwak e. Aposel 4:32-33; Kolosi 1:3-4.
- 6.2 Hiykwe hremekwe mey yaprue me-aw meio wayr e monhre. Efesus 2:10
- 6.3 God hiykwe uwrsa me kokwe ipey-ar nuw-nan. Jon 3:16; 1 Pita 1:17-19
- 6.4 Niohney so kyai

God hiykwe hromo prueyn prueyn-aw mokwe irweyk-aw monhre. God hiykwe kristen prueyn prueyn-aw mokwe Niohney so kyai mokwe, uwrsa har mokwe kamon kamon-aw kow, har mokwe kraiar kow. Hromkwe Niohney so kyai somokwe uwrsa har me hiy mon e kwa nak-meio. Hrom senkin lon ankin, hromo nanpanan kiykiy-ay yor mokwe krai liy lwak.

Efesus 1:13; 1 Korin 12:7; 1 Pita 4:10; 1 Korin 12:7-11.

LESON 7: God Hiykwe hremekwe sow-mawk sehe kow, payhokuaw hiykwe hreme uron-pi ko-ar lwak

Uron ipey-ar: God hiykwe hremekwe Sow ke kow. Sow kokwe mamey sow-mawk nopal nopal senkin senkin me ma may hok non. Sow hokwe hreme hiymon, hrom senkin nonkway e, God hiykwe pekneyweys. God hiykwe hremekwe sehe monhre, hromkwe hiykiaw ma nan senkin lwayr e. Sow-mawk somokwe hreme hiymon sorasor, hrom God hiykiaw ma lwayr senkin lwayr e. Hrom hyo sow-mawk me lonuayk pyay ankin, hromkwe hye kar mon ey. God so sow-mawk mokwe yaprue, hreme hiymon ey.

1 Me-kupaku-ok seirpey-ar

Unsaney prueyn hiykwe me-kupaku-ok seirpey-ar peyrmawk ma nuw-wak ke Jisas se mesopok. Hromkwe Jisas hiy ma ma-sahre onuayk me ke Matyu 22:36-40 mon liy lira mesor.

2 Me-kupaku-ok iha seys hom non


Me-kupaku-ok iha seys-ar somokwe God so sow-mawk. Me-kupaku-ok iha seys somokwe God hiy hreme ma kow hom non. Homkwe God hiy hrom penkin lwayr e nan e, seme mesair kow. Me-kupaku-ok iha seys somokwe hreme hir lyay sous huon. Sa hromkwe hir ouon mon lwak ankin, hromo lwayr yor o, hromo uron o, aymarowh-aw lwak. Kisim Bek 20:1-7.

2.1 God se uron-pi ko-ar lwak ey hokwe, hremekwe mo sow-mawk sohom hiymon sorasor.

- God hiykwe hrom hye uron-pi ko-ar nuw-wak e nan, uwrsa mo eir mon, seyr omeme lowpwarowp mo eir mon.
- Hromkwe senkin senkin god me peie nak-wayr o.
- Hromkwe God so uru se yerki piap non peie mowie o.
- Eypok iha sirom mu nareysyar hokwe hromkwe liwak nieys e. Sohokwe hrom God so ouon mon lwak yor ke hiymon sorasor.

2.2 Sow-mawk somokwe hreme hiymon sorasor, hrom uwrsa har me uron-pi ko-ar lwak e.

- Hromkwe hromo ipey-aio me yaprue nan e.
- Hromkwe unsaney peie lokin kwor okrue o.
- Hromkwe yokun peie nweway kane o.



God so sow mokwe hreme senkin mesair kow, hromkwe God hiykiaw ma nan senkin lwak e.

- Hromkwe yokun peie lopri o.
- Hromkwe okrei peie lokin lor-a-lor o.
- Hromkwe unsaney har mo omeme me peie lira way o.

Sow kokwe sow-mawk nopré nopré kraiar. Me-kupaku-ok iha seys kokwe Sow ko kopi kamón hok non. Sokior-ok Porih mon kokwe sow-mawk mokwe sankaw lwak, 613. Sow-mawk Sokior-ok Porih ko somokwe senkin mowie, "**Juda mo hiymon-sorasor uwr mo Sow.**"

3 Sow-mawk mo meyk-ar hiy non

Ursa homkwe sow-mawk mo meyk-ar hokwe nonkway pa. Sa Jisas hiykiaw sehe hiymon sorasor. Homkwe ok har, Jisas hiy Moses so sow ke ursa me ma hiymon sorasor eme kwa lira mesor:

- 3.1 Mo hwon hno wayh se kwahnaw awnie awnie-aw lira hi, hunkwe me-kupaku-ok 6 ke po kamaun sow. Me-kupaku-ok 6 hokwe senkin me, hunkwe unsaney prueyn peie lokin kwor o. Sawk Jisas hiykwe senkin me, mo hwon kwahnaw awnie awnie-aw lira hi, suw hunkwe po lokin kwor okrue. (Matyu 5:21-22)
- 3.2 Me-kupaku-ok 7 hokwe senkin: Hunkwe unsaney hwon ma huon lopa se nion peie nwewyh kane o. Sawk Jisas hiykwe senkin me, mo hwon unsaney prueyn se kwahnaw lira way hi, hunkwe papo nwewyh kane. (Matyu 5:27-28)
- 3.3 Me-kupaku-ok kokwe senkin hiymon sorasor, hunkwe hno yier-wayh se uron-pi ko-ar kwa lwak. Hromkwe hromo yier-wayh se uron-pi ko-ar lwak e, hrom hromkiaw-ayay uron-pi ko-ar ma lwak senkin. [Wok Pris 19:18] Sawk Juda mo sow me nonkway-uwr homkwe senkin hiymon sorasor, hunkwe hno yier-wayh se kokwe uron-pi ko-ar kwa lwak, sawk hno awia-pow sokwe awnie awnie-aw kwa lira. Sawk Jisas hiykwe senkin me, sohokwe yor yaprue korey. Jisas hiykwe ursa me kokwe hmo awia me uron-pi ko-ar lwak e me. Hiykwe senkin me, hromkwe hromo awia me God se hiy-mesopok e. (Matyu 5:43-44)

4 God hiykwe meyk kreys non, hreme ma monhre hokwe:


- 4.1 Meyk peyrmawk-ar ko hokwe senkin, God hiykwe hremekwe sehe monhre, hye uron-pi ko-ar lwak e, seyr hrom senkin nonkway e, hiykwe hreme uron-pi ko-ar nuw-wak. Matyu 22:37-38
- 4.2 Meyk peyrmawk-ar ko so meyki hokwe senkin, God hiykwe hremekwe sehe monhre, hromo yier-wayh me uron-pi ko-ar lwak e. Matyu 22:39-40

5 Sow ke kamaun sow ey hokwe honon honon korey:

Kamaun sow yor sokukwe owhnan-ok okwe hieyn: Nwoh piaparaw kamón se kokwe sen non piynay sakaww nak-hawon. Sen sohokwe ain-kopi kraiar non lopoñ saronay saronay. Sawk sen sohiy so ain-kopi kamón-aw se kor-onkane ankin, nwoh sohokwe liy oksakane nok. Sa unsaney prueyn hiykwe sow ko kopi nopré kamón ke kamaun sow ankin, unsaney sohokwe heyn non, hiy sow lowpwarowp me po kamaun sow. (Jems 2:10)

Unsaney har homkwe
senkin nan, homkwe Me-
kupaku-ok iha seys-ar
mokwe liy pyay.

Sawk Jisas hiykwe senkin
mesair kow, hromkwe
pekneyweys-aw lwak pey,
sow ke nuw-pyay lowpway
ey hokwe.



6 God hiykwe hremekwe yerki irweyk non lwayr e nan.

God so sow mokwe hreme senkin mesair kow, hromkwe God hiykiaw ma nan senkin lwayr e.

7 Jisas hiykwe Sow kokwe po nuw-meio ousne hrahra ha.

Jisas hiykwe senkin me, "Hakwe sow ke nuw-meio ousne hrahra ha e le." Pekneyweys hokwe Jisas hiykaw. Hiykwe sow kokwe sehe nuw-pyay sopsow. Matyu 5:17; Jon 8:46.

8 Huonok Prosue Mey

Jisas hiykwe senkin me, hromkwe pekneyweys lwak pey, sow ke nuw-pyay sompay sompay ey hokwe. Sow hokwe sokwe lousne, hreme senkin mesair kow e, God hiykwe pekneyweys. Seyr Sow hokwe sokwe lwak, yerki hrom lwayr ey se mesair kow e. Sawk mo hrom sow ke nuw-pyay hi, hromkwe huonok prosue mey kokwe yerki sohiy non liy lonok ley. Enkin kokwe hromkwe huonok prosue mey ke mon sorasor ey:

- 8.1 Huonok prosue mey kokwe nanpanan kiykiy yor ko kueir nonaw lonok. Jisas hiykwe hromo yor piaparaw me hokuaw lokrue. Efesus 2:8-9
- 8.2 Hreme kokwe God so uron lowk yor arian sohok huonok prosue. Taitus 3:5-6
- 8.3 Hromkwe yor piap mon nonaw lwak ankin, suw yaprue pak? Hromkwe lohruw-a nanpanan e. Rom 6:15-18; Rom 5:1-6.
- 8.4 Hai, hromkwe nanpanan e, hromkwe me-kupaku-ok pokwe pyay ey ko? Jon 15: 12,17
- 8.5 Sei, hromkwe nanpanan ohruw e. Hrom Jisas se nanpanan kiykiy-ay mokwe, pay hiykaw lousne o? Hai, hromkwe God so sow mokwe yerki penkin non pyay o? Galesia 3:2-3

- 8.6 Baibel mon kokwe hromkwe senkin lira mesor, "Uwr luwluw-aw ok ma me mokwe, God se nan kiykiy-ay yerki non-aw lwak ey." (Galesia 3:11) Suw senkin, uwrsa, Jisas se ma nanpanan kiykiy-ay homkwe su lwayr ey. Galesia 3:11
- 8.7 Uwrsa Jisas se ma nanpanan kiykiy-ay me kokwe po hrorsay preisia ha. Homkwe liaup-uwrs me-sasay meio ey lopa. Galesia 5:1
- 8.8 Hmey, huonok prosue mey ko meyk hokwe senkin pak, hreme kokwe low senkin senkin hom liy lousne ley? Korey. Galesia 5:16-18; Rom 7:15,19; Filipai 3:12-14.
- 8.9 Hai, hromkwe low senkin senkin hromo owh mon ma lousne omokwe penkin swakakar ey so? Suw hromkwe Leson 14 o, 16 o, serey lohruw-a nanpanan ey.

9. Uron-pi ko-ar yor

Sow lowpwarowp mokwe ok kamon-awaw hokwaw me-sorasor: sokukwe URON-PI KO-AR LWAK YOR HOK NON. Rom 13:8-10; 1 Korin 13.

- 9.1 Uron-pi ko-ar lwak yor kokwe uwrs prueyn prueyn-aw homkiaw liaup. Hromkwe unsaney prueyn se mey kamon yaprue-ar ke meio kow ankin, suw hromkwe unsaney sehe uron-pi ko-ar lwak. Matyu 22:15-21
- 9.2 Uron-pi ko-ar lwak yor kokwe unsaney prueyn se owh ya non liy mon nak-oum, sawk unsaney sehe mon piapay lopa. Owhnan ok: Hunkwe peik lwak. Dokta prueyn hiykwe hne marasin kow, ku-i non. Hunkwe owh ya non nak-oum, sawk sohokwe yaprue, hno owh se mon popriy kow. Hibru 12:5-6,11
- 9.3 Jisas hiykwe hreme senkin mekow, hromkwe hromo awia me seyn, uron-pi ko-ar lwak e. Jisas hiykwe hreme senkin mekow, hromkwe hromo awia me hiy-mesopok e. Matyu 5:44-45

10 Sawk God hiykiaw hreme hiymon lopa hokwe hromkwe uron-pi ko-ar liy lwak ley. Jon 15:4

LESON 8: Poup hokwe posokwaw so? Hiykwe mey mokwe penkin meio o?

Uron ipey-ar: Leson okukwe Poup so uron ko se me sorasor. Seyr hiy mey penkin meio e, seme me sorasor. Leson okukwe mesopok enkin non: Poup hokwe posokwaw so? Hiykwe perey suko se le so? Hiykwe hremekwe penkin mon piapay e nanpanan sakon kawk so? Hiykwe yerki penkin le o, hyo uron ko me meio ousne ey hokwe?

1 Poup hokwe posokwaw so? Hiykwe mey mokwe penkin meio o? (Owhnan aiopey hay 8a ke kwa lira):

1.1 Poup se kokwe God hiykiaw monhre.

Sawk Poup hiykwe hyo yop ayaw-ar ko se po makuayk, payhokuaw hiykwe aryar yor non.

MHO 12:7-9

1.1.1 God hiy Poup se ma monhre hokwe, hyekwe uwr ihey-ar nuw-monhre, seyr yop ayaw-ar nak-kow nok, hyo uron arian non lahan iaup ey se nak-kow.

Sawk Poup hiykwe hyo uron arian non senkin liaup, hiykwe uwr hye ma monhre se nion non-meio wayh-wayh lopa. Poup se kokwe God hiykwe hyo uron arian non lahan iaup e po mekow, sawk Poup hiykwe God hiy hye senkin ma mekow hokwe, yerki piaparaw non nak-anio meio.

1.1.2 Poup hiykwe ki erey suko so god piaparaw. Hromo ki hokwe piaparaw, payhokuaw ki ohiy so mey mokwe God se aw lono. 2 Korin 4:4

[Poup so uru kamon hokwe makwey-uwr, ki ehe ma hiy-wayr hiy non.]: Jon 12:31; Jon 16:7-11]

1.1.3 Satan hiykwe uwrsa ki ko me nuw-oun kekie mon piapay ha e mon: 1 Pita 5:8

1.1.4 Poup so yerki kammon uwrsa me ma lono hokwe 'hok yor': 2 Timoti 1:7


1.2 Poup hiykwe okrei-yor mo aio-ar (owhnan aiopey hay 8b): Jon 8:44

1.3 Poup hiykwe ey-yar so ensel se hieyn meio loior: 2 Korin 11:14


1.3.1 Unsaney har homkwe ay hu ko mokwe ku-i ay sakeyn hin ey non sakeyn hin. Homkwe ayay, ay hu ko hom ma la me, ku-i mon lokin sasei-yay ha nok, hu mon nak-sakeyn ok. Ay hu ko hokwe ay, ku-i mon ma lokin sasei-yay ha sokukwe, yaprue nuw-ira. Hok ay ku-i ko sokwe lira wonay wonay nok ok, la ok. Wo, ay hu ko sokukwe sawk ku-i hiy lokin sasei-yay prosue.

Poup hokwe posokwaw so? Hiykwe mey mokwe penkin meio o?

- God hiykwe Satan se monhre: Eseki 28:14-15, 17
- Satan hiykwe kiy erey suko so god piaparaw: 2 Korin 4:4
- Satan hiykwe uwrsa ki ko me nuw-oun kekie mon piapay ha e mon: 1 Pita 5:8




1 Pita 5:8: "Homkwe homkiaw-ayay kwa lanok anok, seyr iray-iray nonaw kwa lwak. Hmo awia-pow hiykwe laion se hieyn inakok lawor-yay saw anio ira, uwr hiy lokwan-kwori ei-a ey se."



"God hiykwe hreme kokwe hok-niohney se kow pa, sawk Niohney hiy ma kow hokwe krai non, seyr uron-pi ko-ar yor non, seyr yor hunkiaw-ayay lanok anok ey non."
2 Timoti 1:7

1.3.2 Kipay kamon hokwe India-ok mowie. Uwrsa serey suko homkwe ay sapa ko monki ok ma me me mon noweyn noweyn nekie inon. Homkwe su non mon noweyn noweyn. Homkwe senkin lon: Su se nonow paswaw-aw kor-okiahon kawk. Sei, su sohokwe homkwe mays non now mon nak-piynay. Sei, homkwe mein-kowp ney har me su serey nak-kawk kreik. Ay sapa ko monki ok ma me sohokwe su sohiy so ohriar le ankin, hiykwe nuw-nonkway e nuw-mon. Su ouon mon kokwe pay hiykaw lvak o? Sa hiykwe hyo iha ke su so nonow mon kyor-ok ha, mein seme lomun e. Sa monki hiy mein me lomun ankin, hiykwe hyo iha kokwe su sohiy so nonow paswaw nprep sohokwe liy maka-lokway nok ley, payhokuaw hyo iha kokwe po kampueys. Sa monki sohokwe uwrsa hom po mon noweyn nekie, payhokuaw monki hiykwe su se liy way nak-hakan ley, su hokwe mays non now mon po nak-piynay hawon. Monki hiykwe mein me liy preisia hain ley. Sa hiy senkin ma lon sohokwe, hyo lokrue arian ke mon ousne.



1.3.3 Ay sapa ko kamon hokwe wolf ok me. Wolf mokwe nwoh kaman, kipay weyp ma nuw-wak mon ma lwayr hom non. Unsaney har homkwe wolf me mon noweyn noweyn okin kwormakwor. Homkwe senkin lon: Seik-ney ke ki mon swaprein kawk, pi aw mon. Sei, seik-ney ko pi kokwe, homkwe nioh non low. Sei, wolf hiy le nok, nioh seik-pi mon ma lvak seme hyo sane non lowswa. Hiy lowswa ankin, hiykwe hyo sane arian se lei anpruw, sa hiykwe hyo nioh arian se lowswa. Sa hiykwe nioh-aw ley kon-kon-ay okrue.

1.4 ***Yor piap-araw homkwe hreme mon piapay.***

Yor piap-araw mokwe ain-kopi ney kamon se hieyn, hreme mon noweyn noweyn nak-okin sakreik. Seyr ihey mo mays se hieyn, hreme lway pruw-mapruw, seyr mon-pi aruw-araw, hreme ma samapru kawk se hieyn. Rom 6:23; Galesia 6:1; Hibru 12:1.

1.5 ***Poup hiykwe omeme yaprue, God hiy ma monhre me lira memeir meio. Seyr hiykwe omeme yaprue seme piap eyn ma-sahre kankoum.***

Ayay hokwe sawk senkin lousne, uwrsa hromkwe omeme yaprue, God hiy ma monhre seme yerki piaparaw mon nak-meio. Sa hreme nian mon piapay.

<i>Owhnan</i>	<i>Yerki yaprue God hiy ma meio</i>	<i>Yerki har, yor piaparaw hom ma mon ousne hom non</i>
Nweyh kane mey	Mey sokukwe uwrs a non o, seyr sa uwrs non o, homkwaw meio.	-Uwrsa homkwe hom huon lopa non nweyh kane. -Uwrsa ma huon homkwe uwrsa hom ma huon lopa me nion nweyh kane. Homkwe senkin ma lon somokwe God so sow ke pyay pey.
Mein-owon	Mein-owon mokwe uwrsa me hiymon ey.	- Uwrsa homkwe mein-owon me uron-pi ko-ar nuw-wak. - Uwrsa har homkwe har mo omeme me nak-swakakar e mon. - Uwrsa har homkwe uwrsa har me nakway, mey piaparaw me meio kow e.

1.6 *Poup so uron hreme ma nanpanan hokwe senkin:*

- 1.6.1 Poup hiykwe yokun lopri ley. Hiykwe lokin kwor makwor ley. Hiykwe omeme yaprue God hiy hreme ma kow seme mon piapay kow ley. Jon 10:10 ('Yokun-uwr' hokwe erey kokwe hromkwe Poup o, uwrsa hye ma pyay o, hme me).
- 1.6.2 Poup hiykwe uwrsa ki ko lowpwarowp me lokin lor-a-lor kow. Uwrsa lowpwarowp homkwe seyr hyo okrei me nuw-nanpanan kiykiy-ay. MHO 12:9

2 **Poup hiykwe omeme hrom ohna ma Iwak o, seyr omeme hrom ma nuw-nan koukou-ay o, seme meio, hreme ma mon piapay ohokwe.**

Omokwe owhnan har, Satan hiy uwrsa me ma mon makuayk hom non:
(owhnan aiopey hay 8c ke kwa lira):

- 2.1 *Weynpaweyn, uwrsa hom siowp ma nuw-okrue* mokwe senkin, hrom nweyh kane mey o, hu piaparaw lowswa yor o, ayay la yor o, seme yerki piap non ma nak-meio hom non. 1 Jon 2:16
- 2.2 *Mein-own o, omeme har owhi ko hrom ma lira me, hrom seme ma nuw-nanpanan koukou-ay sohom.* 1 Jon 2:16; 1 Timoti 6:9-10
- 2.3 Hromkwe omeme, hrom ma nak-wayr o, mey hrom ma meio o, seme nak-aryar. Hromkwe hrom hiy-wayr krai non ma Iwak o, hrom yop ayaw-ar mon ma Iwak sohom o, seme nak-aryar. Uwr homkwe senkin lon ankin, Satan hiykwe hye liy mon makuayk. 1 Jon 2:16
- 2.4 *Hok yor:* Matyu 10:28
- 2.5 *Nioh siraw-aw, seyr wayh-wayh me nion irweyk irweyk-aw lokima okima nakrok yor--- Poup hiykwe hromo non-waw waw yor me mon piapay e mon.* Jems 3:9-10
- 2.6 *Kristen-wayh me nion irweyk irweyk-aw lokima okima nakrok yor---* Jems 3:14-18
 - *Uwrsa siraw ma non-lotu wayh-wayh me irweyk irweyk-aw mon okima okima nakrok.*
 - *Uwrsa sios irweyk irweyk ko hom ma lon-seyrpaseyr sohom, seyr irweyk irweyk-aw okima okima nakrok yor sohom.* Jems 4:11-12; Kolosi 3:12-15.



- Poup hiykwe hromo non-waw waw yor me mon piapay ley. Hiykwe wayh-wayh me lorionay kow yor kokwe awnie awnie-aw lira. Seyr uwru irweyk irweyk-aw ma lwak hom hmo low me ma lohruw-a mon nonyo sow yor kokwe, Satan hiykwe kar ley pey. Seyr uron kamon-aw ma non-wak yor o, Satan hiykwe me-puar. Hai, hunkwe poso nion kiynon-wak o?

3 God hiykwe hreme uron yaprue po nanpanan sakon kawk kow koruay.

- 3.1 *Hakamay hiykwe senkin me, "Hakwe nonkway, uron ha hne ma nanpanan sakon kawk kow koruay mokwe. Uron somokwe hne hiymon ey, hne mon piapay ey korey, uron somokwe hno omok hiy yaprue lwak ey hiy non!"* Jeremaia 29:11
- 3.2 Aw kokwe posokwaw Iono akre-akre pariawey ey ko? Hrom Iono akre-akre pariawey ey, payhokuaw Hakamay Jisas hiykwe hreme nion non-wak. Rom 8:37-39

LESON 9: Hromkwe yor piaparaw mokwe panoke mon o?

Uron ipey-ar: Leson okukwe uwrsa hom yor piaparaw meio nonaw ma lwak ohom, seme lohruw-a ey. Meyk ipey-ar hokwe senkin, uwrsa homkwe homkiaw-ayay-aw nanpanan. Homkwe God so sow mokwe pyay pey. God hiykwe uwrsa mokwe hiykiaw ma nan senkin lwayr e monhre, sawk homkwe senkin lwayr pey. Sa homkwe homkiaw-ayay o, uwrsa har o, seme mon piapay.

1 Krais hiykwe Farisi mo ok me lon-seyp-a-seyp.

Farisi homkwe ok mokwe irweyk-aw lohruw-a, sawk weynpaweyn mokwe irweyk-aw meio. God so ok erey mon kokwe Farisi homkwe ok irweyk-aw penkin lohruw mo, seyr weynpaweyn irweyk-aw penkin meio mo?

- 1.1 Matyu 23:1-13
- 1.2 Matyu 23:15-17
- 1.3 Matyu 23:27-28


2 Farisi o, takis lonok uwr o, hoho okpey: Luk 18:9-14

- 2.1 Jisas hiykwe okpey sokukwe panoke mesor so? Hiykwe pose nion non-ohruw-a so? (ves 9)
- 2.2 Farisi hiykwe God se kokwe payse nak-me ihey so? (ves 11-12)
- 2.3 Takis lonok uwr hiykwe God se penkin me so? (ves 13)
- 2.4 Hai okpey sohok ko meyk-ar kokwe Jisas hiykwe penkin me so? (ves 14)

3 Weynpaweyn lowpwarowp mokwe mo uron mon loksian ha pie.

(Wouk-ok har homkwe senkin me, weynpaweyn mokwe swaw mon loksian ha, seyr har homkwe senkin me, wowkuom mon loksian ha) (Owhnan aiopey hay 9a ke kwa lira)

- 3.1 Weynpaweyn omeme, uwr so uron ko se ma lousne, hiy mon orki orki-yay, hyekwe: Mak 7:17-23
- 3.2 God hiykwe uwrsa hom penkin uwrsa lwak e, mo hmo uron me lira. Hiykwe uwrsa, hom ma lira seme lira pey. Luk 16:14-15
- 3.3 Now yaprue o, now piaparaw o, hoho okpey: Luk 6:43-45
 - God hiykwe hno lwayr yor so peyrmawk liarok uwr → hunkwe yaprue lwak
 - Hno lwayr yor hokwe hunkiaw hiy-wayr anok anok → hunkwe yaprue lwak lopa



4 Hromkwe unsaney prueyn God se ma pyay so uron se mon sorasor. Hromkwe seyr unsaney prueyn God se pyay pa ma lwak so uron se mon sorasor:



4.1 Erey mon kokwe hromkwe weypaweyn piaparaw me lira: Galesia 5:19-21

- Yokun lopri yor
- Okrei-ok sor
- Nanpanan piaparaw
- Unsaney lokin kwor
- Unsaney har me me monmamon
- Akiaup
- Ompreir kawk
- Lira way nan kripakri
- Yokun nweyh kane yor
- Nweyh kane yor irweyk eyn ma mon hom non.
- Uwr mo owhi o, sa mo owhi o, seme your your non nakey yor
- Aryar
- Owk-lapala yor

4.2 Weynpaweyn piaparaw somokwe uwr so ouon ko me lousne. Homkwe uwr se nuw-mon orki orki yay. Sa weypaweyn piaparaw mokwe mo senkin lousne ha pie. Mak 7:23

4.3 Sawk hromkwe Niohney Pekneyweys so weypaweyn me lonokyaw e. Galesia 5:22-26

5 Liwak nanpanan nok, omeme seme God se mesopok:

5.1 Owhnan 1: Owhnan okukwe hwon Baibel ke nion non-meio yerki kamon se mesair kow. Sam 23:1-3.

Hunkwe enkin liy mesopok: "Hakamay, hakwe nonkway, hunkwe hano sipsip kow-a uwr. Hakwe omeme kamon ohna lwak pey, korey. Hunkwe hane kwa mon iwak nieys. Hunkwe hane kwa mon iwak marowhway. Hunkwe hane lwayr yor iwon se kwa kow."

Owhnan 2: Efesus 3:16-18 ke kwa lira mesor. Hunkwe God se enkin liy mesopok: "Hakamay, hakwe hne senkin mesopok, hunkwe hane kwa mon kraipakrai, hno krai hno panpaniowni mon ma lwak non. Hakwe senkin mesopok, hno Niohney Pekney-weys hiykwe hane senkin ka lon. Hakwe Jisas hiy, hano uron mon o, hano lwayr yor mon o, serey lwayr e nan. Hakwe senkin mesopok, hano lwayr yor hokwe now se hieyn ka lwak, meyk mokwe God so uron-pi ko-ar mon ka loksow kraipakrai. Sa hakwe mey lowpwarowp mokwe hno uron-pi ko-ar non liy meio. Hakwe senkin mesopok, hakwe Krais so uron-pi ko-ar se nuw-nonkway popriy ley. Hakwe senkin nuw-nonkway popriy ley, hyo uron-pi ko-ar hokwe aiopey hay, seyr keirpey hay nuw-wak, seyr meipey hay nuw-wak, seyr ayaw-ar nuw-wak, seyr ouon-ar nuw-wak."

5.2 Hunkwe seyr ok Baibel ko eme owhnan eir ko seme hieyn liy meio:

- | | | |
|-------------------|------------------|-------------------|
| 1. Sam 139:23-24 | 2. Sam 51 | 3. Efesus 3:16-21 |
| 4. Rom 8:28-29 | 5. Rom 8:37-39 | 6. Jon 6:37-40 |
| 7. Filipai 2:5-11 | 8. Filipai 4:4-7 | |

LESON 10: Hromo yor piaparaw mo ayay

Uron ipey-ar: Uwsa homkwe hme God hiy penkin monhre ihey ihey me, seme ma-mon piapay. Hom senkin lon ankin, homkwe sawk God so iha-mey ihey ke mon piapay. Sa uwrsa homkwe ayay piaparaw me seme mon ousne. Sawk ayay piaparaw somokwe hme nian ma-sahre mon piapay.

Leson erey mon kokwe hromkwe hromo weynpaweyn hom penkin lwak e, seme nanpanan ey. Seyr meyk-ar hrom yor seme ma meio seme nak-nanpanan ey.

1 Hrom ma kiy-wayr omokwe yerki hokwe kreys non.

1.1 Yerki kamon hokwe hremekwe God so mon hiy-ey.

1.2 Yerki kamon se pyay ankin, hromkwe yaprue lwak lopa.

Kwa lira nonkway, hromo lwayr yor hom enekwei enekwei piap lwak me. Piap, yaw ko hokwe pokon ko piap so eir mon lwak.

1.2.1 Poup hiykwe omeme, hrom ma nan koukou-ay kraiy me meio. Hiykwe omeme somokwe seme meio, hreme mon piapay e. (Owhnan aiopey hay 10a ke kwa lira).


Rom 1:21-23, 29-31

- Uwsa, God so hiy-wayr krai se lira nonkway pa ma lwak sohom non. Homkwe God se kokwe seirpey-ar-ok me pey. Rom 1:21
- Uron eym-nawp ma lwak sohom, seyr weynpaweyn piaparaw me ma meio sohom: Rom 2:8
- Weynpaweyn piaparaw o, eym-nawp o, seme uron-pi ko-ar ma lwak sohom: Jon 3:19
- Sa hromkwe omeme hromkiaw ma nan koukou-ay seme pyay ankin, hremekwe mo hom mon piapay: 1 Korin 13:1-3


Satan hiykwe hreme mon piapay e mon. Hiykwe omeme, hrom ma nan koukou-ay kraiy me meio.

Rom 1:21-23, 29-31


1. Uwsa, God so hiy-wayr krai se lira nonkway pa ma lwak sohom non



3. Weynpaweyn piaparaw o, eym-nawp o, seme uron-pi ko-ar ma lwak sohom



4. Yor piaparaw somokwe uwrsa me mon piapay



1.2.2 Sios-uwsa homkwe mey lopa puraw liy lwayr, sawk homkwe ayay yaprue me liy leip sawan kreik ley. Efesus 4:17; Efesus 5:8; 1 Pita 2:16; Efesus 5:15; Jon 6:37, 40, 47; Jon 3:16-18; Efesus 1:5; Rom 8:22-25, 35-39; Jon 10:28.

2 Yor piaparaw hokwe enkin lousne ha pie.


2.1 Yor piaparaw mokwe nonkumey mon kokwe enkin lousne pie: Aisaia 14:12-14 ke kwa lira mesor.

2.2 Yor piaparaw hokwe uwrsa me kokwe enkin lousne pie: Stat 3:1-6 ke kwa lira mesor.

3 Yor piaparaw ko ayay piaparaw (Owhnan aiopey hay 10b ke kwa lira):

3.1 Omokwe yor piaparaw ko ayay piaparaw:

- Unsaney weynpaweyn piaparaw me ma meio homkwe, meyki hokwe homkwe yor piap me meio nonaw lwak e mon.
- Yor piap mon wayr
- Okrei-god me kampueys
- Niohney piaparaw me nanpanan kiykiy-ay
- Har me awnie awnie-aw lira
- Yier-wayh me nion lon-seyrpaseyr
- Lira way nan kriypakriy
- Kasaw hohuaw
- Mey hne nian-aw hiymon ey me meio
- Omeme, uwrsa har hom ma nak-wayr seme lira way
- Weynpaweyn piaparaw hu piaparaw lowswa non meio: Galesia 5:19-21



3.2 God hiykwe weynpaweyn somokwe uron nuw-owk kworpakwor: Aisaia 5:1-4,7.

4 God hiykwe hremekwe luwluw-aw kyai ke kow e mon. Luwluw-aw kyai sokukwe hromo korey.

- 4.1 Hrom uwrsa lowpwarowp ki ko mokwe heyn non. God hiykwe hreme liy mon piapay, hromo yor piaparaw me hokuaw kokwe. Rom 3:9-11
- 4.2 God hiykwe hremekwe hyo luwluw-aw kyai ke po mekow. Rom 3:21-26
- 4.3 Hromkwe hromo uron arian non lahan iaup ey. Jon 3:16-18
- 4.4 God hiykwe Jisas se po isay omniy. Hiykwe yor piaparaw mon pa. 2 Korin 5:21
- 4.5 Jisas se kokwe hromo yor piap me hokuaw po isay omniy. Jisas hiykwe hrom lokrue pror kawk ha ame swahya sow. 1 Pita 2:24
- 4.6 Krais Jisas hiykwe now ayaw mon ya non aiopey hay nak-oum nok, lokrue, hrom su lwayr e. Galesia 3:13
- 4.7 Kwa nanpanan. Hakamay hiykwe uron liy lowk. Hiykwe seyr nays-ok liy me. Rom 11:22

LESON 11: Hromkwe God so maym kokwe huonok prosue mey mon lira

Uron ipey-ar: Leson erey mon kokwe hromkwe God so uron ko ipey-ar hreme ma nanpanan se mesor nanpanan ey. Hiykwe hyo uron lowk yor ke hreme mesair kow e mon. Hiykwe hromo yor piap me lorionay kow e mon. Hiykwe hrom hyo ohriar lwak e mon. God so uron se yerki senkin non nonkway hokwe ipey-ar. Nonkway sokukwe sawk hromo lwayr yor me ma-sahre-hiymon kraipakrai popriy. Seyr hrom God se nion non-waw-waw yor ke hiymon.

1 Peyr hrom God so maym ke lonok lopa ma lwak hokwe, hromo uron mokwe penkin lwak mo?

Hromkwe God so maym ke lonok e mon ankin, peyr hromkwe hromo uron hom penkin lwak e, seme kwa nonkway popriy. (Owhnan aiopey hay 11a ke kwa lira).

1.1 Hromkwe senkin nan, hromo uron mokwe yor piap kraiar lopa. Sawk sohokwe ok-ar korey. Korey law.



1.2 Yor piap hromo uron mon ma lwak mokwe, hromkiaw liy mon-say ley. Hromo uron mokwe hromkiaw liy mon popriy ley.

"Uron hiykwe okrei ipey-ar non. Hyo okrei hokwe ayaw-ar nuw-wak, seyr liy mon popriy ley. Uron se kokwe posokwaw nonkway popriy a?" Jer 17:9




Hromkwe senkin nan, hromo uron mokwe yor piap kraiar lopa. Sawk sohokwe ok-ar korey.

*"Uron hiykwe okrei ipey-ar non. Hyo okrei hokwe ayaw-ar nuw-wak, seyr liy mon popriy ley. Uron se kokwe posokwaw nonkway popriy a?"
Jer 17:9*




God hiykwe hne kokwe uron iwon o, niohney iwon o, liy kow

*"Hakwe hne kokwe uron iwon se kow ey, seyr hakwe hno mon kokwe niohney iwon se kwawk kow ey. Hakwe uron mein kraipakrai me hieyn ma lwak seme monsay ey. Hakwe hne kokwe uron iwon hane lonuayk me pyay ey me kow ey."
Esekiel 36:26*



Mat 27:26-30; 35-44
Jon 10:17-18

Hromkwe God so maym kokwe huonok prosue mey mon lira.



2 Korin 5:21
Galesia 3:13
2 Pita 3:9
Rom 2:4

1.3 Sawk God hiykwe liy mon popriy. Hiykwe hremekwe uron iwon o, niohney iwon o, liy kow: "Hakwe hne kokwe uron iwon se kow ey, seyr hakwe hno mon kokwe niohney iwon se kwawk kow ey. Hakwe uron mein kraipakrai me hieyn ma lwak seme monsay ey. Hakwe hne kokwe uron iwon hane lonuayk me pyay ey me kow ey."

Esekiel 36:26

2 God hiykwe hremekwe uron-pi ko-ar aiopey hay nuw-wak. Hiykwe hremekwe hyo ohriar non-wak wayh wayh e nan (Owhnan aiopey hay 11b ke kwa lira).

2.1 God hiykwe hremekwe uron-pi ko-ar nuw-wak. Hiykwe hremekwe uron-pi ko-ar ma lwak hokwe, hiykwe senkin mesair kow: Matyu 27:26-30, 35-44; Jon 10:17-18; Rom 5:6-8.

- 2.2 Hrom God se nion yaprue non-wayh-wayh ey hokwe, hremekwe hromo yor piap homkiaw mon sous-a-sous. God so wayh-arar nuw-wak ey hokwe, peyr hromkwe yor piap me kwa nuw-okriy ha lowpway. Hromkwe God se mesopok e, hromo yor piap me ka lorionay kow. Jon 5:39-40; Jon 6:35-37.

3 God hiykwe po naruok koruay, seyr hiykwe kar ley, hromo yor piap me lorionay kow ey hokwe.


3.1 Jisas hiykwe hromo yop ke po swahya sow!

Suw senkin mesair kow, hiykwe hreme lorionay kow ley (Owhnan aiopey hay 11c ke kwa lira).

- 3.1.1 Yier hrom ma ley neyney liok hokwe hreme mon piapay ey.

- 3.1.2 MHO 1:5b-6 "Panpaniowni o, krai ipey-ar o, Jisas so mon-aw ka nuw-wak.....hiykwe hreme uron-pi ko-ar nuw-wak, seyr hreme papo hrorsay kow, hromo yor piaparaw mo ouon ko mokwe, hyo nioh arian non....."

Jisas hiykwe hromo yop ke po swahya sow!



- 3.1.3 Lorionay kow yor hokwe pay so?

- Hreme heyn lowpwarowp ko me ma hrorsay kow mokwe, hromkwe mein-owan kamon non nakway pa.
- Hromo weynpaweyn piaparaw me hokuaw kokwe, God so aw-mayr hokwe liy lousne. Lorionay kow yor hokwe senkin: God so aw-mayr hokwe, Krais so nioh hiy mon weyp.
- God hiykwe hrom hye ma-sahre nakway e liy mesopok. Sawk lorionay kow yor hokwe senkin, hrom God se ma-sahre nakway mey sokukwe, God hiykwe hyo uron lowk yor arian non po me sous.

- 3.1.4 God hiy hreme lorionay kow ankin, hiykwe hromo yor piap me seyn ma-nanpanan pey. Hibrus 8:12

3.2 Ok omokwe senkin mesair kow, God hiykwe hreme lorionay kow e mon:

- 3.2.1 2 Korin 5:21

- 3.2.2 Galesia 3:13

- 3.2.3 2 Pita 3:9

Omokwe seyr kwa lira mesor: 1 Timoti 2:3-6, Taitus 2:11, Jon 3:16-17

4 God so maym hokwe hreme hiymon,

God so maym hokwe hreme hiymon, sa hromkwe hromkiaw-ayay-aw ouon mon seme kyori osi ha. Seyr hromkwe yor piap me meyki seme kankoum sow hain. God so maym sokukwe hreme God so owh mon hiymon nok.

- 4.1 God hiykwe hremekwe panoke lorionay kow ley. Hiykwe hreme panoke huonok prosue ley. Sawk hyo uron-pi ko-ar o, hyo uron lowk yor o, sohom aiopey hay ma nuw-wak me hokuaw, hiykwe hreme lorionay kow e sehe mon.
- 4.1.1 Maym kokwe God so uron-pi ko-ar hreme ma kow hiy non. Maym sokukwe hromkwe Mey kamon yaprue ke ma meio ke hokuaw lonok pa.
- 4.1.2 God hiykwe hremekwe hyo maym ko kueir nonaw huonok prosue, enekwei hrom hye uron kamon-aw lwak non. Maym sokukwe God hiy puraw ma kow hok non. Efesus 2:8-9
- 4.2 God so uron lowk yor hokwe hreme mon kankoum, yor piap ko me. God so uron lowk yor sokukwe hreme God so owh mon hiymon kankoum nok. Rom 2:4; Efesus 3:16-19.
- 4.3 God hiykwe hreme liy isay kow ha ley.

Hunkwe uron har piap me po lahan iaup pyay, sawk God hiykwe hne liy lokriy ha ley. Hiykwe hne kokwe liy isay makuayk ley, pariawey-ar hokwe. Filipai 1:6

5 Hunkwe enkin liy meio:

Enekwei har hunkwe God se nion kwa non-wak. Mey, God hiy ma meio me kwa nanpanan. Yerki hwon lanio ey se kwa lahan iaup.

6 Hosea o, Gomer o, hoho okpey ke kwa lira mesor (maym kow yor ko okpey):

- 6.1 Sam 103 : 3-4 (1-5) - God hiykwe hremekwe ki-saw aiopey hay ko me lono swakakar prosue.
- 6.2 Hosia 1:1-10:

Hakamay hiy Israel me ma me hokwe, hiykwe Hosea se kokwe senkin mekow, "Hosea, hunkwe sa kwa huon. Hno sa hokwe hne-aw nan ey korey. Hno ney homkwe seyr pouh ko kyai ke lonok ey. Yerki liyliy-aw non kokwe, hano uwrsa homkwe hane po lokriy hain, seyr hane-aw nan pey."

Israel uwrsa homkwe wosion-kreys souryawp-ar ko me hieyn lwak ey, liy sor ley. Enekwei ohokwe God hiykwe hmekwe senkin me, "Homkwe hano uwrsa korey," sawk enekwei pa le, hiykwe hme kokwe senkin me ey, "Homkwe Su lwayr God so ney orhey non!"

- 6.3 Ok eme kwa lira mesor: Hosia 11:1-4, 7-9, 12 "God hiykwe hreme eheyr lyuk. 'Hakwe hme kokwe penkin lorionay ey so.....?'"
- 6.4 God hiykwe hreme po ma-nakway prosue. Hiykwe hreme kokwe Jisas so nioh non nakway.
- 6.5 Jisas hiy now ayaw mon ma lokrue hiy non: Matyu 27:26-30; 35-44
- 6.6 Jisas hiykwe now ayaw mon ma lokrue hokwe hyo uron arian nonaw lokrue. Hye kokwe unsaney prueyn me-sasay pa. Hiykwe hremekwe uron-pi ko-ar nuw-wak. Jon 10:17-18.

LESON 12: Huonok prosue mey kokwe pay so?

Uron ipey-ar: Leson erey mon kokwe hromkwe hrom Krais se uron kamon-aw ma lwak, uron imnok amnok nan lopa ma lwak, seme lohruw-a nanpanan ey. Krais hiykwe hremekwe yor piap mo ayay piaparaw ko me lono swakakar prosue wayr wayr. Uwrsa prueyn prueyn-aw mokwe God hiykwe aiopey hay nan, sa hiykwe prueyn prueyn-aw mokwe yerki irweyk irweyk-aw non meio. Hromkwe ok eme lira ey: uron kankoum o, nanpanan kiykiy-ay o, yor piap ko me huonok prosue o. Hromkwe ok-ar kamon ke lira ey: God hiykwe hremekwe hyo ney me nion non-wak e po lway mno. Hromkwe ok kamon kamon-aw mo meyk-ar me lira ey.

1 Huonok prosue mey kokwe ok eme nak-me:


Yor piap ko me ma kankoum o, mey Jisas hiy hreme huonok prosue e ma meio ke ma nanpanan kiykiy-ay o. Aposel 20:20-21.

1.1 Uron kankoum

- 1.1.1 Meyk: Ok hwon paraw ma lohruw, seyr yor hwon paraw ma meio me uron ma lowk hiy non
- 1.1.2 Hromo weynpaweyn paraw-uh mokwe (uwr porih) po ley lowpway: 2 Korin 5:17
- 1.1.3 God hiykwe hne kokwe unsaney iwon mon wak ey (lwak yor iwon ke lie lowm-a-lowm): Efesus 4:20-24
- 1.1.4 Jon Hu mon Prouk uwr hiykwe senkin hiymon sorasor: "Homkwe hmo uron me ma kankoum sow se mesair kow e mon ankin, ayay yaprue homkwaw ka leip sawan kreik." Matyu 3:1-2, 7-8.

1.2 Nanpanan kiykiy-ay

- 1.2.1 Meyk: Hrom Krais se uron imnok amnok nan lopa ma lwak hiy non. Senkin ma nuw-nonkway popriy hiy non, hiykwe hreme God so ohriar hiy-wak.



- 1.2.2 Hromo yor arian mokwe hreme liy huonok prosue ley. Hromkwe mey Krais hiy hreme ma meio kow ke nyay-nyay. Efesus 2:8-9; 2 Korin 5:15; Rom 6:22-23.
- 1.2.3 Jisas hiykwe hromo king ka Iwak. Hye-aw pyay e kwa me-loray. Hye-aw pyay ey hokwe, hunkwe kwa nuw-nakrion say. Hakamay-ok ma me so meyk-ar kokwe senkin, hromkwe hyo ouon mon Iwak.
- 1.2.4 God hiykwe hrom mey yaprue ma meio se hokuaw huonok prosue pey, korey. God hiykwe hreme sehe huonok prosue, hrom mey yaprue me meio e.
- *God hiykwe mey hrom meio ey mokwe po lonhan kow koruay:*
Efesus 2:8-10 (ves 10: Krais Jisas so kueir nonaw kokwe, God hiykwe hreme kokwe mey yaprue me-aw meio wayr e monhre. Mey yaprue somokwe, hiykiaw ma mon onhan onhan koruay kow hom non.
 - *God hiykwe senkin po nanpanan sakon kawk koruay, hromkwe hyo ney norwayo Jisas se hieyn Iwak e:* Rom 8: 28-29

1.3 Jisas hiykwe hromo yor piap me po mon-say kow, sa hremekwe uron mnow-mnow-aw me po kow:

- 1.3.1 Jisas Krais so nioh hokwe hromo yor piap me hawr mnow-mnow kow: MHO 1:5; Hibru 1:3
- 1.3.2 Huonok prosue so meir hokwe senkin, hromkwe heyn non ma-Iwak pey: Rom 8:1
- 1.3.3 God hiykwe hremekwe liwak yor iwon se kow: Efesus 4:22-24; Tatus 3:5; Jon 3:3.

1.4 God hiykwe hremekwe hyo ney Iwak e po mon wak.

- 1.4.1 Ow hromkwe God so ney norwayo swanyo: Galesia 4:4-6; Efesus 1:5.
- 1.4.2 God hiykwe hremekwe omeme Krais se ma kekie kow mokwe, hreme seyr ya kow a: Galesia 4:7; Rom 8:17.
- 1.4.3 Hromo kyai paraw-uh ko mokwe po ley. Sohokwe hrom Jisas se nion now ayaw mon ma non-okrue sawan se hieyn. Sa enkin hromkwe Iwayr iwon non liy Iwak: Galesia 2:20
- 1.4.4 Jisas hiykwe hreme nion non-wayr e le, seyr hreme hyo Niohney Pekneyweys se kow e le: Jon 14:16-18, 23
- 1.4.5 Hromkwe Jisas se kokwe Niohney Pekneyweys so krai so kueir nonaw lonuayk me pyay wayr: Galesia 5:16

2 Hrom uron ma kankoum ohokwe, hromkwe penkin lon a?

- 2.1 Yor piap me me hrorsay e. 1 Jon 1:8-9
- 2.2 Yor piap mokwe hromkwe awnie awnie-aw lira nok, meyki kankoum sow hain. Esekiel 18:30-32; Rom 6:2.

- 2.3 God hiy hwon pay mey me meio e mon e, hunkwe kwa meio. Hno uron lowpwarowp non: Aposel 26:20
- 2.4 God se kokwe imnok amnok peie nan o. Hiykwe hne liy kankoum. Filipai 1:6

3. Uwr uron ma kankoum mo owhnan:

- 3.1 Takis-lonok uwr hiykwe senkin lira nonkway, hiykwe weynpaweyn piaparaw po meio: Luk 18:13-14
- 3.2 Uwrsa Pentikos enekwei sok ma hokruw: Aposel 2:37-38

4. Hromo nan kiykiy-ay homkwe ayay mokwe enkin me leip.

- 4.1 Hunkwe senkin nan kiykiy-ay ankin, God hokwe prueyn-aw, suw okar, sawk hno nan kiykiy-ay-sokukuwe, hne liy hiymon popriy ley. Payhokuaw, niohney piaparaw homkwe seyr sohokwe nonkway: Jems 2:19
- 4.2 Hno uron hokwe senkin kwa nanpanan kiykiy-ay, Krais hiykwe hne po lokrue kow: Rom 10:9-10
- 4.3 Enkin hunkwe Hakamay iwon non: 2 Korin 5:15
- 4.4 Hunkwe hno Hakamay iwon se lonuayk pyay ey hokwe uron kar nonaw meio. Sohokwe hunkwe hno owh lowpwarowp non nak-pyay. Rom 6:16-19
- 4.5 Nan kiykiy-ay yor kokwe ayay yaprue me mon eip. Hunkwe God hiy yaprue ma nan senkin lwayr. Jems 2:14-17

LESON 13: Kristen homkwe meir penkin non lwak e?

Uron ipey-ar: Leson okukwe Kristen hom meir penkin non lwak e seme lohruw-a ey. Uron kraiar mokwe mamey 1 Jon ko me lonok ey. Serey mon kokwe senkin me: uron-pi ko-ar lwak yor kokwe Kristen mo meir ipey-ar. Uron-pi ko-ar lwak yor sokukwe uwrsa homkwe liy lira nonkway. Hromkwe uron nuw-kankoum hriysow ha ankin, hromkwe uron-pi ko-ar lwak yor ke senkin liy mon ousne.

1 1 John 1:1-3

1 Jon 1:1-3 mon kokwe aposel prueyn Jon [uwr iha seys mu nareysyar mo prueyn Jisas hiy ma liaup huonok] hiykwe senkin me: “*seyr hromkwe su lwayr peyow peyow ey, Aio se nion ma non-wak, sa hromo mon ma lousne kokwe hme mesor sanion sow kow. Hromkwe senkin seme ion, sa hromkwe Aio o, hyo ney Jisas Krais o, hehe nion non-wawwaw.*”

1.1 Ok kamon:

Nyo prueyn Saut Amerika ko, hyo pouh hokwe papo lokrue. Hyo orih hiykwe hu piaparaw kraiar lowswa uwr. Orih hiykwe hye yaprue hiy-wayr mno pa. Sohiy so hokuaw kokwe ney hiykwe laylay piaparaw me sasow yier mon lanio owkhvor owkhvor pawk a, seyr yokun lanio a. Hiykwe senkin sehe ion, payhokuaw hiykwe ayay kraiar lopa. Hiykwe seyr Kristen-sa prueyn ko ayay me yokun lanio opri a. Sawk sa sokukwe nyo sehe God se hiy-mesopok wayr. Sa sokukwe sa nyo sehe lway mno e nan. Sei, hokwe sa senkin sokwe ion. Hhyekwe yaprue nonaw hiynuw-wayr mno ihey. Hokwe hye ayay kow-a nok, omeme owh mon lie ey nakway kow. Hokwe hye uron-pi ko-ar nuw-wak. Sawk nyo sohokwe yokun la nonaw nuw-wak. Hiykwe seyr laylay piap-araw me sasow yier mon lanio pawk a nonaw lwak. Sa sokukwe hyekwe yaprue hiymon, sawk hiykwe hyo yor paraw-uh mokwe meio nonaw lwak, hiykwe lokriy ha pa. Hiykwe hyo pouh iwon kokwe uron kreys non lwak. Peyr hiykwe hyo pouh iwon kokwe kwa lira nonkway mon sorasor popriy. Hiykwe weynpaweyn hiy a iwon serey meio ey mokwe owl-lapala. Hiykwe uwrsa, a serey ma lwayr hom penkin lwayr e, hiykwe nonkway lwak pa. Hyekwe honon honon nuw-wak. Hiykwe peyr kwa mon sorasor nonkway. Sawk hiykwe sosokaw nuw-mon sorasor, hiykwe saw-mon sorasor sau-sau pa.

1.2 **Meir hokwe pay so?** Meir hokwe yor kamon uwr prueyn hiy ma nak-wayr hiy non. Yor sokukwe uwrsa har me senkin mesair kow, uwr sohokwe irweyk, hme hieyn liyliy-aw korey. Seyr yor sokukwe senkin mesair, uwr sohokwe wrku kamon ko.

1.3 **1 Jon ke kwa lira mesor:** Yerki sohiy non kokwe hromkwe senkin lira nonkway, hromkwe God so wayh ihey-ar.

2 Hmo lwayr yor mokwe yerki God hiykiaw ma mesair kow senkin kwa lwayr. 1 Jon 1:6-7 ke kwa lira mesor.

2.1 Yerki sohiy non kokwe homkwe ey-yar so ney orhey non liy lwak. Ey-yar sohokwe Jisas hiykiaw. Jon 12:36 ke kwa lira mesor.

2.2 Lwayr yor senkin homkwe ayay enkin me leip: yor yaprue o, yor luwluw-aw o, okar-ok o. Efesus 5:8-9 ke kwa lira mesor.

3 Hromkwe God hiy pay me me-kupaku e, seme meio. 1 Jon 2:3-6 ke kwa lira mesor.

- 3.1 Uron-pi ko-ar hokwe hreme hiy-me kraipakrai, hrom God se lonuayk me e. Hromkwe God se uron-pi ko-ar pankaw lwak e, hromkwe seyr God se kokwe sankaw lonuayk me.
- 3.2. Ayay hokwe enkin se leip: Jon 14:21 ke kwa lira mesor.

4 Uwrsa lowpwarowp hno ohriar mon ma lwak me uron-pi ko-ar kwa lwak. 1 Jon 2:9-11; Jon 3:10-11, 14-18; Jon 4:20-21.

- 4.1 Hano yier-wayah hokwe posokwaw so? Luk 10:29-37 ke kwa lira mesor.
- 4.2 Sa hromkwe unsaney prueyn se uron-pi ko-ar lwak ankin, hromkwe hye kokwe omeme mokwe ihey ihey-ar me-aw liaup kow.

5 Ki ehe uron-pi ko-ar peie lwak o. 1 Jon 2:15-17.


- 5.1 Ok ki ma me sohiy so meyk-ar hokwe senkin: omeme ohi ko, omeme hrom ma nan koukou-ay sohom, seyr aryar yor [Leson 8 o, 9 o, serey kwa lira].
- 5.2 Ki ko omeme somokwe senkinaw lwak peyow peyow ey korey. Sawk Kristen homkwe hmo lwayr mokwe God se nion non-wayr. Homkwe lwayr peyow ey non lwak ey. 2 Korin 4:18.

6 Hakamay Jisas se nion kwa non-okin nasay. 1 Jon 2:24 ke kwa lira mesor.

- 6.1 ‘Lokin nasay’ so meyk hokwe senkin: siraw-aw lwak, swakuwmay loumaloum, ohriar lwak. Jon 15:4-7 ke kwa lira mesor.
- 6.2 Sa hromkwe Hakamay se nion non-okin nasay ankin, hromo lwayr yor mokwe irweykaw lousne. Hromkwe ayay yaprue kraiar leip. Jon 15:4-5; Jon 8:31-32; Jon 15:7 me kwa lira mesor.

7 Niohney Pekney-weys hiykwe hreme me sanion sow kow uwrt. 1 Jon 4:13

- 7.1 Me sanion sow uwrt hiykwe weypaweyn paraw ma lousne me unsaney prueyn se masahre sor kow uwrt hiy non. Hiykwe enekwei sohiy non weypaweyn sohok penkin lousne me, seme ma-mesor kow popriy.
- 7.2 Niohney Pekneyweys hiykwe hromo niohney me senkin mesor kow, hromkwe God so ney orhey non. Rom 8:14-16 ke kwa lira mesor.



8 Weynpaweyn yaprue me kwa mon. 1 Jon 3:10 ke kwa lira mesor.

- 8.1 **Kristen hiykwe weynpaweyn yaprue me-aw mon, mo enekwei honon honon hiy lousne hi.** Hiykwe mey paswaw nopr seyn, yaprue meio. Mo unsaney hye lorok ira pa lwak hi, hiykwe mey meio nonaw lwak. Luk 16:10 o, Taitus 2:7 o, seme kwa lira mesor.
- 8.2 **Kristen hiykwe okrei-yor lopa.** Hiykwe senkin seyn mesor pey, ok kopi kamon kokwe okar sor, ok kopi kamon kokwe sawk okrei ke nak-sor pekyay. Hiykwe okar okar ke-aw nuw-sor sompay sompay ha. Efesus 4:25 ke kwa lira mesor.

9 Kristen hiykwe ki ohiy so krai me lono akre akre. 1 Jon 5:4-5.

- 9.1 Hno uron hokwe krai kwa nuw-wak. Payhokuaw, Hakamay Jisas hiykwe ki ehe po akre akre. Jon 16:33.
- 9.2 Kristen hiykwe ki ohokwe Krais so nioh non akre akre ha. MHO 12:11 ke kwa lira mesor.

10 Homkwe senkin kwa nonkway, homkwe lwayr peyow ey non.

Sohiy so hokuaw kokwe Jon hiykwe 1 Jon 5:13 kokwe mo sehe meyamey.

11 Kristen mo meir yaprue

Pita hiykwe weynpaweyn yaprue Kristen mo lwayr yor me hiymon kraipakrai ey mokwe po mey-a-mey. Weyn yaprue somokwe ayay yaprue me leip. 2 Pita 1:5-9 ke kwa lira mesor.

12. God hiykwe hromo mesopok mokwe lonuayk.


Hromkwe God se omeme senkin senkin me liy mesopok o? Hai, God hiykwe hreme pankaw kow a? 1 Jon 5:14-15 ke kwa lira mesor.

LESON 14: Hromo awia se akre akre ha yerki hiy non

Uron ipeyar: Hromkwe hiy-wayr krai, Krais hiy hreme ma kow ko okar-ok kokwe kwa nuw-nonkway popriy. Seyr niohney so omeme aw nak-ono ey, hrom ma nak-wayr mokwe hromkwe nonkway kwa lwak. Omeme sohom non kokwe hromkwe Poup se liy lono akre akre. Mey okukwe hromkwe ok Efesus 6 mon ma lwak ke lira ey, seyr awia se lono akre akre ha yerki, ok sohok ma hiy-me sorasor me mon sorasor ey.

1 Hromkwe kipay hokwe kreys non Iwayr: ki ohi ko o, ki niohney ko o [Owhnan aiopey hay 14a ke kwa lira].

- 1.1 Kipay niohney so hokwe, seyr kipay ohi so hiy okar ma lwak senkin lwak.
- 1.2 Hromkwe aw kwa lono. Efesus 6:2 ke kwa lira mesor.
- 1.3 Satan so yeik ipey-ar hokwe 'okrei' hok non.
 - Satan hiykwe okrei mo Aio: Jon 8:44 ke kwa lira mesor.
 - Satan hiykwe okar-ok ke mon waysowp-asowp. Matyu 4:5-7 ke kwa lira mesor.
 - Satan hiykwe hiykiaw-ayay God so ensel hiy ma nak-yar senkin nak-yar loior. 2 Korin 11:14 o, Matyu 24:24 o, seme kwa lira mesor.
- 1.4 Krais hiykwe Poup so mey ke mon piapay e le. 1 Jon 3:8 ke kwa lira mesor.



Hiy-wayr uwr: Satan.
Nanpanan kiykiy-ay yerki: okrei-ok.
Hromo weynpaweyn: omeme hreme nian-aw hiyomon ey me-aw nan.
Weypapweyn sohom mo ayay: Hromo liwak yor me mon piapay hom non.

Hiywayr-uwr: God.
Nanpanan kiykiy-ay yerki: Okar-ok.
Hromo weynpaweyn: Hromkwe God se uron-pi ko-ar lwak, seyr uwrsa har me o.
Weypapweyn sohom mo ayay: Kar ley yor o, liwak marowhway yor o.

2 Hromkwe hromo awia se kwa nuw-nonkway popriy. 1 Pita 5:8-9 o, 1 Jon 5:19 o, 2 Tesalonaika 3:3 o, ok seme kwa lira mesor.

- 2.1 Hromkwe Poup so uron ko mokwe kwa nuw-nonkway. Sohokwe ipey-ar. Seyr hyo uron ko me meio ousne yerki mokwe hromkwe kwa nuw-nonkway popriy.
- 2.2 Satan hiykwe kipay lowpwarowp mokwe uron irweyk irweyk-aw non, seyr uwrsa prueyn prueyn-aw mokwe uron irweyk irweyk-aw non.

3 Kristen homkwe okar mon liy lanio, seyr okrei mon liy lanio, uwrsa God se nonkway lopa ma lwak me hieyn.

- 3.1 Hiy-wayr uwr: Satan.
 - Nanpanan kiykiy-ay yerki: okrei-ok.
 - Hromo weynpaweyn: omeme hreme nian-aw hiyomon ey me-aw nan.
 - Weypapweyn sohom mo ayay: Weypapweyn hromo liwak yor me mon piapay hom non.
- 3.2 Hiy-wayr-uwr: God.
 - Nanpanan kiykiy-ay yerki: okar-ok.

- Hromo weynpaweyn: Hromkwe God se uron-pi ko-ar lwak, seyr uwrsa har me o.
- Weynpaweyn sohom mo ayay: kar ley yor o, liwak marowhay yor o.

4 God so hiy-wayr krai hokwe hreme liy hiymon. Ok eme kwa lira mesor: Kolosi 1:13; 1 Jon 4:4; Luk 1:37; Efesus 5:8-10; 1 Korin 10:13.

- 4.1 God hiykwe Poup se kokwe hreme ma monhre senkin liyliy-aw monhre. Poup hiykwe God se nion o, God so krai se nion o, liyliy-aw non-wak pey.
- 4.2 Hromkwe God so hiy-wayr krai se nyay nyay hi, krai God hiy hreme ma kow se.

5 Hromkwe hromo niohney so awia hokwe enkin Iono [Owhnan aiopey hay 14b ke kwa lira]. 1 Pita 5:8-9

- 5.1 Hromkwe senkin nonkway e, hromo awia hiykwe hreme leykawn.

5.1.1 Hromkwe hrom nompou perey lwak e, somokwe hromkwe nonkway kwa nuw-wak popriy. Seyr enekwei piap sohom lousne enekwei o, somokwe hromkwe nonkway kwa nuw-wak popriy.

5.1.2 Omeme penkin penkin hrom ma lira way homkwe seyr hreme senaw leykawn. Jems 1:14 ke kwa lira mesor.

- 5.2 God so omeme hromo owh se nak-swakomay sue ey ke kwa lie loum-a-loum: Efesus 6:10-13 o, Jems 4:7 o, seme kwa lira mesor.

- Sumow-mays: God so okar-ok. Efesus 6:14
- Kwor: yor luwlwuw-aw. “God so okar-ok kokwe hunkwe sumow-mays ke hieyn kwa lok sapeykyay. Seyr God so yor luwlwuw-aw kokwe hne ka hiymon sous-a-sous popriy, kwor ke hieyn.” Efesus 6:14.
- Sune-owhi: liwak marowhway yor ko ok-ihey ke mesor e ma lonhan onhan koruay. Efesus 6:15 o, 1 Pita 3:15 o, seme kwa lira mesor.
- Iheyn: hromo nan kiykiy-ay yor hok non. Jisas hiykwe hromo Iwayr yor mo Hakamay. Hye-aw lonuayk pyay e kwa me loray. Efesus 6:16 ke kwa lira mesor.
- Makwey-kokway: God so me-huonok prosue krai. Efesus 6:17 ke kwa lira mesor.
- Niohney pekney-weys so aw-seik: God so ok. Efesus 6:17.



“Hunkwe God so aw nak-ono omeme lowpwarowp me kwa seyn-kreik, poup so uron ko piap-araw me lorok sa-miymiyay ono ey hokwe.”

Ephesians 6:11

- Mey somokwe mesopok nonaw kwa nak-meio, Niohney hiy hne ma hiy-anok anok senkin, sa God hiy hne ka hiymon. Omeme, hwon ohna pay me lwak e, kwa mesopok. Efesus 6:18
 - Lorok kraiay yor: Efesus 6:13b-14a.
 - God so aw nak-ono omeme lowpwarowp me kwa seyn-kreik, poup so uron ko piaparaw me lorok sa-miymiy ono ey hokwe. Efesus 6:11.
- 5.3 Eysawk eysawk kwa hiy-ono akre akre. Galesia 6:2; Hibru 10:23-25, ok eme kwa lira mesor.
- 5.4 Okrei hom hno nene se mon kopyo e ipan peie lon o. Hibru 3:12-14; Jems 1:23-25.

6 Krai, God hiy hreme ma kow se nak-meio ey hiy non.

- 6.1 Hromkwe Jisas so uru se mowie. Luk 10:17; Aposel 3:6-7.
- 6.2 God so ok. Matyu 4:8-11; Efesus 6:17.
- 6.3 God se mesopok yor, seyr enekwei hrom ayay la lopa, hu lowswa lopa. Mak 9:28-29; Aposel 14:23.
- 6.4 Krais so nioh. MHO 12:11
- 6.5 God hiy hreme nian ma hiymon me ma mesor sanion sow. MHO 12:11
- 6.6 Yayh God se lowk nakie yor. Kolosi 3:16; Efesus 5:17-20.

LESON 15: Hai, hromkwe pekney-weys-aw payhokuaw lwak e?

Uron ipey-ar: Hromo God se nion non-wawwaw yor hok yaprue penkin lwak e, sohokwe hromo Kristen mo lwayr yor hom yaprue penkin lwak e, sehe-aw nyay-nyay. Hreme ma huonok prosue hokwe, irweyk. Hreme ma huonok prosue hokwe hromo Kristen mo lwayr yor hom yaprue penkin lwak e, sehe nyay nyay pey. Mey okukwe pekneyweys-aw lwak yor ke me kraipakrai. Mey okukwe hreme senkin me sasay, “pekney-weys-aw lwak e, payhokuaw Hakwe pekney-weys” (1 Pita 1:16). Mey okukwe seyr hromo yop Krais se nion ma non-wak o, seyr hrom Krais so mon ma leyr nonay nonay ie, hoh irweyk penkin non-wak e, seme mesorasor kow. (Ok-mawk 1.1 ouon mon kwa lira).

1 God hiykwe pekney-weys:

- 1.1 God hiykwe pekney-weys, sa hromkwe hyekwe sehe kampueys e: MHO 4:8-11
- 1.2 Ok “pekney-weys” sokukwe Niohney Pekney-weys so uru kopi hiy non.
- 1.3 1 JON 1:5 hokwe senkin me, “God hiykwe ey-yar, sa hyo mon kokwe eym-nawp lopa.”

2 Pekney-weys:

- 2.1 Ok pekney-weys sohiy so meyk hokwe senkin ‘irweyk-aw lokima nakrok.’ Pekney-weys-aw lwak ok kokwe mo sehe me, hromkiaw-ayay irweyk-aw God se lokima nakrok kow e.
- 2.2 1 Jon 1:5 mon kokwe ‘ey-yar’ se me. Sohokwe weynpaweyn yaprue ihey me me. God so yor lowpwarowp mokwe luwluw-aw homkwaw.

3 Hromo nan kiykiy-ay yor mokwe God so inour mon kokwe, penkin lwak ey mo?

- 3.1 Aposel Pol se hieyn, hromkwe enkin liy me, “Hakwe senkin nonkway, yor yaprue mokwe hano mon lwak pey. Hakwe hano owh yor piaparaw non se me.” Rom 7:18.
- 3.2 David hiykwe senkin mesopok, ‘God so inour mon kokwe posokwaw harok a?’ Sam 24:3-4.
- 3.3 Pita hiykwe hremekwe pekney-weys lwak yor ke mesorasor kow. 1 Pita 1:15-16 ke kwa lira mesor.
- 3.4 God hiykwe hyo krai se hromo owh mon meio ousne ley. Hromo uron mokwe hiykwe hyo ey-yar o, hyo pekneyweys yor o, sohom non nonkreik woki woki-yay. Omeme ihey-ar somokwe hromo yiawk monuo non ma meio mon lwak. Yiawk somokwe ki non nekie hor monhre pahre. Yerki sohiy non kokwe uwrsa homkwe God so panpaniowni hokwe liy lira, mo yiawk sohom nompou lwak hi. 2 Korin 4:6-7.

4 God hiykwe hreme po huonok yawriy, hyo ney lwak e

God hiykwe hreme hyo omeme po mon wak, enekwei hiy hreme hyo Niohney Pekneyweys se kow menkin. Hiykwe Niohney Pekneyweys se kow e me loray. Meir sohokwe senkinaw lwak peyow peyow. 2 Korin 1:21-22; Efesus 1:13-14; 2 Korin 5:5 me kwa lira mesor.

5 Sawk God hiykwe seyr hremekwe pekneyweys-aw lwak e me kupaku. Suw hromkwe 1 Pita 1:15-16 mon lira.

Ok: Uwr yier se ma hiy-wayr ira kraipakrai so ney norwayo peyr-ar ko hiykwe omok kokwe orih so siopsow yier se hiy-wayr ira kraipakrai ey. Ney sohokwe hiy pouh ko mu la nonaw yier se liy hiy-wayr ira kraipakrai o? Korey. Hiykwe hyo hiy-wayr ira kraipakrai mey sokukwe nak-mon sorasor lari wakiayr. Hyo yop kokwe senkin, omok kokwe hiykwe yier se hiy-wayr ira kraipakrai ey. Sokukwe hyo yop-ar, sawk peyr hiykwe liy saw-onok meio ley. Peyr hiykwe hakamay kwa lwak. Meir non lie. Peyr hiykwe hyo mey ke kwa monsorasor lari wakiayr. Sohokwe yerki-ar.

6 Pekneyweys lwak ey hokwe kreys non (Hibru 10:14 ke kwa lira mesor)

6.1 Yop


- 6.1.1 Enekwei hrom God se nanpanan kiykiy-ay ankin, enekwei sohokwe hromkwe God so ney lousne. Enekwei sohiy nonaw kokwe God hiykwe Krais so luwluw-aw yor kokwe hreme kiynuw-kow. Filipai 3:9.
- 6.1.2 Ohokwe hromo yop. Enekwei hrom Krais se huonok yawriy ankin, enekwei sohiy nonaw kokwe hromkwe pekneyweys lwak. God hiykwe hreme liaup, hyo Niohney Pekneyweys se hreme ma kow so kueir nonaw. Niohney Pekneyweys hiykwe hromo mon lwayr. Efesus 1:13-14; 2 Korin 1:21-22.
- 6.1.3 Yop sokukwe hromkwe mey non meio lonok pa. Korey. God hiykwe hremekwe Krais so nioh non nakway. 1 Korin 6:20; 1 Pita 3:18.
- 6.1.4 Hromkwe yaprue korey, yop senkin sokwe hreme ma kow hokwe. Rom 5:8; Kolosi 2:13-14.

6.2 Pekneyweys lwak nonay nonay ie ey so yerki hiy non

- 6.2.1 Sawk God so ok hokwe hremekwe seyr Krais se hieyn lwak e me. Krais se hieyn lwak yor sokukwe senkin mowie, pekneyweys lwak nonay nonay ie ey. Sohokwe yerki hromo Kristen mo nan kiykiy-ay hom owh ma leyr nonay nonay ie hiy non. 1 Pita 1:15 Hromkwe owh leyr nonay nonay ie ankin, hrom pekneyweys lwak, Krais se hieyn


Hromkwe pekneyweys-aw payhokuaw lwak

Meyk hokwe senkin ‘irweyk-aw lokima nakrok.’



Hibru 10:14
Hibru 10:17-24
Hibru 10:25-29

Enekwei hrom God se nanpanan kiykiy-ay ankin, hromkwe God so ney lousne. Seyr God hiykwe Krais so luwluw-aw yor ke hreme kow.




Sawk God hiykwe hremekwe Krais se hieyn lwak e nan. Krais se hieyn lwak yor sokukwe senkin mowie: pekney-weys lwak nonay nonay ie.

Pekney-weys lwak ey hokwe kreys non

Yop


Hromkwe God so ney lousne ankin, God hiykwe Krais so luwluw-aw yor ke hreme kow.



Efesus 1:13-14
2 Korin 1:21-22

Pekneyweys lwak nonay nonay ie ey so yerki

Sohokwe Kristen hom owh ma leyr nonay nonay ie se me.



Efesus 4:22-24

Hromkwe owh leyr nonay nonay ie

6.2.2 Hromo nan kiykiy-ay hom owh leyr nonay nonay ie ankin, hromo pekneyweys lwak yor hokwe seyr nonay nonay ie. God so ok hokwe hremekwe weynpaweyn paraw hrom Krais se nonkway lopa ma mon nakyas mokwe lokri ha e me wayr. Efesus 4:22-24; Filipai 3:12-14.

6.3 Sa Krais so mon kokwe God hiykwe hremekwe senkin po lira nonkway, hromkwe heyn lopa.

Hiykwe hreme kokwe senkin po lira, hromkwe pekneyweys. Sohokwe hromo yop Krais so mon ma lwak hok non. Yop sokukwe enekwei hrom Niohney Pekneyweys se lonok non lousne pie. Niohney Pekneyweys hiykwe hromo mon le wayr, sawk hromo nan kiykiy-ay homkwe ney me hieyn-aw peie lwak wayr wayr o. Hromo nan kiykiy-ay homkwe owh kwa leyr nonay nonay ie. Sohokwe hromo pekneyweys lwak yor, hok owh ma leyr nonay nonay ie hok non. Sa enekwei hromo nonkway, Krais se ma nonkway hom nonay nonay ie ankin, hromkwe Jisas hiy ma lwak senkin lwak.

7 God hiykwe hromo yor piap mokwe nuw-orionay kow lowpway.

Hiykwe hreme senkin po me sanion sow, hromkwe pekneyweys. Sawk hromkiaw kokwe God hiy hreme senkin ma me sanion sow hokwe, hromo lwayr yor non mesair kow e.

- 7.1 Hromo lwayr yor mokwe pekney-weys lwak lopa lwak ankin, hromkwe hromo Hakamay se uron mon owk kworpakwor. Suw seyr senkin mesair kow, hromkwe hye nonkway lwak pey. Hibru 10:17-24; Hibru 10:25-29.
- 7.2 Ursa homkwe aposel Pol so hiy-me sorasor ok har mokwe piap eyn lira mesor nanpanan. Pol hiykwe senkin hiy-me sorasor pa, Ursa homkwe yor piap-araw me-aw meio ankin, sa God so maym hok lousne. Korey. Rom 3:8; Rom 6:1-4.
- 7.3 Sohiy so hokuaw kokwe hromkwe pekneyweys-aw seme lwak e. Jems 4:8

8 Hai, hromkwe Jisas se hieyn penkin lwak nonay nonay ie o? (pekneyweys):

- 8.1 Jisas se hieyn lwak ey hokwe mey non meio nonay nonay ie.
Jisas hiykwe hromo lwayr yor me woki mon wak e mon. Jon 10:10; 2 Korin 6:18-7:1
- 8.2 Filipai 1:6: God hiykwe hromo uron me mon kamakoum nonaw lwak. Hiykwe hreme Krais se hieyn mon wak wayr wayr.

LESON 16: Yerki, hrom kyai piaparaw me lokriy ha ey

Uron ipey-ar: Hrom kyai piaparaw me akre akre ha ey hokwe, honon honon korey. Payhokuaw, yerki krompri-ar omokwe, hromkwe sohom non nak-anio ankin, hremekwe honon honon liy lwak ley:

- Niohney Pekneyweys so krai
- God se mesopok yor
- God se nonkway ma lwak popriy

Seyr lesion erey mon kokwe hromkwe mey yaprue hrom meio wayr wayr ey, seme nan ey. Mey somokwe hremekwe yerki kreys non hiymon ey: Hromkwe God se nonkway nuw-wak popriy. Seyr hromo uron mokwe God so weynpaweyn me nuw-pay e nuw-nan koukou-ay.

1 Kyai

Kyai hokwe pay so? Kyai homkwe perey loksian ha o ?

Hrom nanpanan -→

-→ **Hrom meio -→**

-→ **Kyai lousne -→**

-→ **Hromo lwayr yor -→**

-→ **Kyai mo ayay piaparaw**

Kyai hokwe puraw liy lousne ley, enekwei hwon meio e liaup ankin, sohiy non lousne. Weynpaweyn hrom ma meio omokwe, hromkiaw ma nanpanan liaup hom non. Weyn hrom kwahnaw masuw-iaup meio sokukwe hromkwe enekwei kraiar senaw meio, sa hromkwe nanpanan popriy meio pa seme lwak, payhokuaw hromkwe po nuw-meio hrekawk. Weynpaweyn har, hwon ma lahan iaup meio mokwe, hunkwe enekwei kraiar eyn po meio, sa hunkiaw kokwe hwon weyn sokwe ma lahan iaup meio kokwe nonkway lwak pey, payhokuaw hunkwe po meio hrekawk. Hwon ma lahan iaup hokwe, hunkiaw kokwe nonkway nak-wak pey.

2 Leykawn

2.1 Leykawn hokwe hno makworom se ma mesopok ir hiy non, weynpaweyn kamon ke meio e.

- Weynpaweyn sokukwe piaparaw liy lwak.
- Seyr hunkwe omeme yaprue se liy nan koukou-ay, sawk hunkwe yerki piaparaw non liy meio.

2.2 Leykawn hokwe yor piaparaw korey. Hibru 4:13 ke kwa lira mesor.

2.3 Leykawn hokwe yerki krompri non lousne:

2.3.1 Satan. Mak 1:13 ke kwa lira mesor.

2.3.2 Ki ohiy. Galesia 1:3-4

2.3.3 Omeme hromkiaw ma lira way sohom. Jems 1:13-14.

2.4 Sawk hromkwe leykawn mokwe liy akre akre ha. Hibru 4:16 o, 1 Korin 10:13 o, kwa lira mesor.

3 Omokwe yerki hrom leykawn me hakan ey hom non

3.1 Hunkwe kyai piaparaw, hwon ma meio hrekawk hrekawk ke lokriy ha e mon ankin, hunkwe hno yerki penkin lanio ne e kwa ma-nanpanan popriy. Hunkwe yerki yaprue perey lokriy hain so?

Hromkwe kyai piap me ma-nanpanan ey. Hunkwe yor piap me swahya-sow e mon ankin, hunkwe mey ipey-ar nuw-meio ey. Hunkwe kyai piaparaw, hwon ma meio ke lokriy ha e liy nakyas. Peyr hunkwe hno yor piap, hwon ma meio wayr ke kwa ma-nanpanan. Yor piap sokukwe hno lwayr yor mon penkin mon ousne ko? Hunkwe kwa nanpanan, hunkwe yor sokukwe yerki penkin non mon-sous ey so?

3.2 God se mesopok yor

Hunkwe God se kwa mesopok. Hunkwe God se kwa mesopok, hiykwe hne kokwe hwon yor piap me ma liaup meio yor sokwe liy mesair kow. Peyr hunkwe yor piap hwon ma liaup meio sokukwe, hwon ma meio so meyki lira nonkway ha kok. Sa hunkwe senkin nanpanan, hunkwe krai lopa, yor piap sokwe lokriy ha ey hokwe. Sawk mo senkin lwak hi, hunkwe God se mesopok nonaw kwa lwak, hiykwe hne liy hiymon, kyai sokwe lokriy ha ey hokwe. Seyr hunkwe ursa hno kyai piaparaw sohok ma mon piap-ay wayr mo owh mon kwa ley, sa hunkwe hme kwa mesopok, homkwe hne ka lorionay kow.

3.3 God hiy hne penkin lonuayk me me, seme kwa pawk

Hunkwe God hiy hne ma ma-sahre me mokwe, peie pawk kane kane o. Hunkwe pawk nonaw lwak ankin, hiykwe hne kokwe yerki hwon hakan ousne ey hokwe enekwei pariahey-ar sok kampi kow ha (1 Korin 10:13). Hiykwe hne po hiymon a, leykawn me lira nonkway ey hokwe (ok 3.2 eir mon ma lwak ke kwa lira). Leykawn somokwe hne kokwe yier piaparaw hwon yor piaparaw me lahan iaup meio ey mon hiy-ey. Hunkwe God se kwa mesopok, hiykwe hne kokwe yop hwon kankoum ne ey me liy mesair kow, sa hunkwe yier kyai piaparaw hwon ma meio peyay peyay sohokwe liy lour swaheir. Hunkwe God se kwa mesopok, sa hiykwe hne liy hiymon, sa hunkwe yier, hwon kyai piaparaw sokwe ma meio ohriar ley pa liy lwak. Hno wayh me kwa mesopok, sa homkwe hne God se ka hiy-mesopok. Seyr, hno wayh-om me kwa mesopok, homkwe hne senkin ka mesopok nonkway, hunkwe kyai piaparaw sokukwe po akre akre ha pak .

3.4 Kyai piaparaw mokwe kyai yaprue non kwa swahyasow

3.4.1 Enekwei Poup hiy hreme leykawn ankin, Efesus 6: 10-17 o, Jems 4:7 o, Matyu 4:1-11 o, seme kwa lira mesor.

3.4.2 Enekwei ki ohiy hreme leykawn ankin, Stat 39:6-12 o, 2 Timoti 2:22 o, seme kwa lira mesor.

3.4.3 Omeme, hrom ma nan koukou-ay hom hreme leykawn ankin, ok eme kwa lira mesor. (Owhnan aiopey hay 16a ke kwa lira)

- 1 Korin 9:24-27 Mey, hwon Hakamay se nonkway popriy ey me kwa meio hniypahniy. Mey somokwe senkin: God so ok ke lira mesor, God se mesopok, wayh wayh me nion non-swahokruw.
- Galesia 5:16 - Sa hunkwe senkin lira, yor piap hwon ma meio wayr wayr somokwe, hunkwe ma-meio lopa.
- Filipai 4:8-9-Hunkwe yor yaprue ihey-ar, uwrsa hom yaprue ma lira, seme-aw kwa nanpanan.
- 2 Timoti 2:22 - Uwr wakiayr o, sa sokruan o, hmo uron mokwe yor piap mokwe kwa nuw-iekuw. Homkwe yor piap mokwe mepuar e. Enekwei enekwei, homkwe yor yaprue me meio e kwa nuw-nakrion say. God se kokwe nanpanan kiykiyay nonaw kwa lwak. Uwrsa har me uron-pi ko-ar kwa lwak. Seyr uwrsa har me nion yaprue kwa non-wawwaw.


- “Ha yor piap hne mon pa lwak ey hokwe, hakwe hno ok mokwe hano uron mon po kawk sue.” Sam 119:11
- 2 Timoti 3:16-17 ke kwa lira mesor.
- “Yerki, uwri piap hom ma liaup se peie liaup o. Uwr weynpaweyn piaparaw me ma meio me nion peie non-anio o.Yerki yor piap non me kwa lour swaheir. Serey peie lanio o. Kwa kankoum sow hain. Yerki irweyk mon kwa ley!” Sindaun 4:14-15
Uwr piap hom perey ley e, hunkwe hme nion peie non-ey o. Uwr yor piap me ma mon mo yor me peie pyay o. Hme kankoum sow hain nok, hno yerki arian mon kwa lanio.
- Luk 22:40, 46 - God se kwa mesopok, sa God hiykwe hno uron yor piap me mon e ma iekuw sehe ka mon weihawehi.
- Rom 12:1-2 ‘Hano wayh-om, God hiy hreme uron ma lowk se hokuaw kokwe, hakwe hme senkin me-kupaku

Yerki, hrom kyai piaparaw me lokriy ha ey




1 Korin 9:24-27

Mey, hwon Hakamay se nonkway popriy ey me kwa meio hniypahniy. Mey somokwe senkin: God so ok ke lira mesor, God se mesopok, wayh wayh me nion non-swahokruw.




Galesia 5:16

Niohney Pekneyweys hiy hno lwary yor ke ka hiy-anok anak wayr. Sa hunkwe senkin lira, yor piap hwon ma meio wayr wayr somokwe, hunkwe ma-meio lopa.



Filipai 4:8-9

Hunkwe yor yaprue ihey-ar, uwrsa hom yaprue ma lira, seme-aw kwa nanpanan.



2 Timoti 2:22


Homkwe yor piap me kwa mepuar. Enekwei enekwei, homkwe yor yaprue me meio e kwa nuw-nakrion say. Nan kiykiyay yor o, uron-pi koar yor o, lwak marowhway yor o, seme kwa mon eyr nonay nonay ie.

Yerki, hrom kyai piaparaw me lokriy ha ey



Sam 119:11


“Ha yor piap hne mon pa lwak ey hokwe, hakwe hno ok mokwe hano uron mon po kawk sue.”



Sindaun 4: 14-15

Yerki, uwri piap hom ma lanio mon peie lanio o. Yerki piap se lour swaheir nok, hno yerki arian mon kwa lanio.

Jisas hiykwe wain-now, hromkwe kueim. Sa hiy lopa hokwe, hromkwe mey kammon liy meio ousne ley. Jon 15: 5,8



“Hakwe hno aio lwak ey. Seyr homkwe hano ney norwayo swanyo lwak ey.”

Wayh-om, ha uron-pi ko-ar ma lwak om, God hiykwe ok somokwe hreme po me loray. Sohiy so hokuaw kokwe hromkwe omeme hromo owhi o, niohney o, seme ma mon orki orki mo meiaw mon lwak e. Hromkwe God hiy krai aiopey hay non ma lwak hokwe, enekwei enekwei kwa nanpanan. Sa hrom senkin lon ankin, hromkwe God hiy hyo uwrsa arian hom penkin lwak e nan e, hromkwe senkin liy lwak. (2 Korin 6:18-7:1)

kraiay, homkwe homkiaw-ayay naws prawk kow e, God se, paraw ursa hom sipsip-ney me ma lokin kwor naws kow me hieyn. God se ipan kwa lon, hno nanpanan yor se ka kankoum kow. Sa homkwe ursa iwon liy lousne. Sa homkwe God so mey hme ma kow mokwe liy lira nonkway meio. Seyr weypaweyn God so uron se kar mon ey ey mokwe, homkwe liy lira nonkway meio.

- Kolosi 3:2- Omeme nonkumey mon ma lwak me-aw nanpanan wayr-wayr e.
- Jems 5:16 - Homkwe hmo weypaweyn piap-araw me mesor hrar-say e, hmo wayh-wayh me nion.
- “Mo uwur yaprue hiy enekwei iha sirom mu nareysyar non makuayk hi, hiykwe ma-loksian. Sawk low homkwe uwur yor piaparaw me ma mon se kokwe mon piapay.” Sindaun 24:16

Ursa okar yor me ma meio me kokwe, low enekwei iha sirom mu nareysyar non liy lousne, sa homkwe liy makuayk, sawk homkwe liy suarok prosue ley. Homkwe nan kiykiy-ay yor ko yerki hokwe lanio nonaw lwak. Sawk low homkwe ursa yor piap non mokwe mon piapay.

4. God so wayh ihey-ar

Enekwei hrom God so wayh ihey-ar lwak ankin, hromkwe God so ohriar pa lwak. Sa hrom God so wayh ihey-ar ma lwak se God so ohriar lwak ankin, omeme ki erey suko mokwe hromo nene mon kokwe yaprue ma-lira lopa.

- 4.1 Jisas hiykwe wain-now, hromkwe kueim. Sa hiy lopa hokwe, hromkwe mey kamon liy meio ousne ley. Jon 15: 5,8.
- 4.2 Hromkwe God, ok okwe ma me se meyki liy kankoum sow hain ley:

God, hiy-wayr krai lowpwarowp non hiykwe senkin me, ***Hakwe hno aio lwak ey. Seyr homkwe hano ney norwayo swanyo lwak ey.***

Wayh-om, ha uron-pi ko-ar ma lwak om, God hiykwe ok somokwe hreme po me loray. Sohiy so hokuaw kokwe hromkwe omeme hromo owhi o, niohney o, seme ma mon orki orki mo meiaw mon lwak e. Hromkwe God hiy krai aiopey hay non ma lwak hokwe, enekwei enekwei kwa nanpanan. Sa hrom senkin lon ankin, hromkwe God hiy hyo ursa arian hom penkin lwak e nan e, hromkwe senkin liy lwak. (2 Korin 6:18-7:1)


- 4.3 Hrom God se nonkway pie ankin, hiykwe pau hreme hyo ohriar ka-nekie nok. Sa hromkwe God hiykiaw panapan lwak, seyr God hiykwe hreme kamakoum. Hiykwe hreme kokwe uron ouon mon kankoum ha pie, sei, kumay se nak-kankoum ousne ok. Filipai 1:6
- 4.4 Mo low hromo owh mon lousne sa-ousne hi, hromkwe liy akre akre ha. Hremekwe honon honon liy lwak ley. God hiykwe weypaweyn lowpwarowp hromo owh mon ma lousne seme nak-meio. Hiykwe hreme hiy mon ey hokwe, weypaweyn seme ayay yaprue me mon eip. Low enekwei mokwe hrom hyo owh mon ley ankin, hiykwe senkin lon. (Rom 8:28-29)

LESON 17: Hromkwe har mo yor me payhokuaw lorionay kow e?

Uron ipey-ar: Leson okukwe lorionay kow yor ko meyk-ar ke hiy-me sorasor. Leson okukwe Hakamay Jisas hiy penkin lwayr me, seme lira ey. Seyr omeme, hiy ma hiymon sorasor me lira. Seyr yerki, hrom God so lorionay kow yor ke mesopok lonok ey se hiy-me sorasor. Seyr yerki, hrom har me lorionay kow ey se mesair kow.

1 Nan kriypakriy yor (Owhnan aiopey hay 17a)

- 1.1 Hromkwe aw-mar lie yor ke mon sous pa lwak ankin, sa nan kriypakriy yor hok lousne.
- 1.2 **Owhnan:** Hno uron nonaw senkin kwa nanpanan loior, hunkwe hno su-pow nam ke mein mon swapar. Sawk hunkwe yorpow kuor sohokwe corey mon mnow mnow pey, seyr hunkwe yaprue iray iray pey. Sa yorpow kuor hokwe liy hroway ley, seyr kuor hokwe piaparaw-ar nuw-wak. Sawk hno yorpow hokwe piap-ar nuw-wak ankin, hno dokta hiykwe liy leiwankwe sasow, seyr hunkwe liy lokrue. Nan kriypakriy yor hokwe seyr senkin. Hunkwe aw-mar lie yor hno uron mon ma lwak se mey kamon meio pa lwak ankin, nan kriypakriy yor hokwe hno uron mon kokwe piaparaw-ar nuw-wak. Seyr nan kriypakriy yor ke nion kokwe low har homkwe seyr liy lousne sa-ousne. Nan kriypakriy yor kokwe seyr unsaney liy lokin kwor okrue. Hromkwe sohokwe hromo uwrsa saku mo owh mon ma lousne mokwe po lira nonkway, payhokuaw homkwe yor piap hme ma mon mokwe homkwe manonsawkriy e liaup.
- 1.3 God hiykwe senkin me, hromkwe uron owh-ya loum kriypakriy yor non peie lwak o. Efesus 4:31-32 ke kwa lira mesor.
- 1.4 Kristen homkwe seyr uron liy nan kriypakriy. Efesus 4 hokwe Kristen me lohruw. Efesus 4:17 ke kwa lira mesor.
- 1.5 Nan kriypakriy yor hokwe seyr hrom uwrsa har me nion non-wawwaw yor ke liy mon piapay. Seyr hromo kar ley yor me liy mon pros.



2 Hrom nan kriypakriy yor non lwak ankin, hromkwe ayay enkin me lira nonkway:


- Hromkwe kar ley pey, seyr hromkwe kar ley yor kraiar lopa.
- Hromkwe kasaw senaw hohuaw, mo meyk lopa hi.
- Hromkwe mey mokwe hromkiaw penkin nan e, senkin meio e mon.
- Hromkwe enekwei enekwei senkin nan, hromkwe yerki-ar mon lwak, sa hromkwe uwrsa har mo hiy-me now-anow ok mokwe liy lonuayk ley.
- Aw-mar lie
- Hromkwe God se kokwe hromo uron lowpwarowp non pyay pey.

3 Hromkwe nan kriypakriy yor non lwak ankin, hromkwe enkin kwa lon:

- God se kwa mesopok, sa God hiykwe hne ka hiymon. Hyo hiymon yor non kokwe, hunkwe uwrsa har mokwe liy lorionay kow, seyr nan kriypakriy yor kokwe liy lokriy ha.
- God se mesopok nok, hno nan kriypakriy yor sokwe God so iha mon ka kow ha lowpway.
- God hiykwe meyk, unr prueyn sohiy hne ma mon piapay hokwe hne liy mesair kow. Hunkwe unsaney sehe yor piap po mon pak? God se kwa mesopok, sa hiykwe hne ka mesair kow.

4 Hromo non-wawwaw yor mokwe pay homkwaw mon piapay o? Hai, hromkwe penkin lon ey mo? (Owhnan aiopey hay 17b ke kwa lira):

4.1 Hrom lowpwarowp mokwe hromo non-wawwaw yor kokwe low non. Yor har mokwe non-wawwaw yor me liy mon piapay. Hromkwe wayh-wayh mokwe uron kamon-aw lwak pey. Hromkwe ok mokwe nanpanan ohruw pey, hromo ok mokwe uwrsa har me mon piapay. Seyr unsaney prueyn so yor piap hokwe hromo non-wawwaw yor ke liy mon piapay. Matyu 18:21 ke kwa lira mesor.




4.2 Weynpaweyn senkin hom lousne ankin, hromkwe yerki kreys so kamon se liy liaup:

- Nan kriypakriy yor o, ma-lon sawkriy yor o.
- Lorionay kow yor o, uron kamon-aw manon-wak yor o.

5 Yerki hrom nan kriypakriy yor ke lono ey hiy non:

- 5.1 Hromkwe aw-mar lie yor non lwak ankin, suw hromo low. Hromo aw-mar yor mokwe saw-oksian. Sa hromkwe God se ipan kwa lon, hiykwe hromo aw-mar yor ma saw-oksian oksian yor ke ka mon kuein-yay kow. Aw-mar yor kokwe yor piaparaw liy lwak, sa God hiykwe low sokwe ka mon nonyo sow kow (Leson 16).
- 5.2 Aw-mar hokiaw-aw kokwe yor piap korey, sawk hromkwe ipan sankaw peie lon o. Hromkwe kwa saw-okin kwor krue. Efesus 4:26-27 ke kwa lira mesor.
- 5.2.1 Unsaney prueyn hiy hne mon piapay ankin, hunkwe yerki kreys ohom mo kamon se liy liaup.
1. Hunkwe nan kriypakriy yor ke liy liaup:
 - Hno uron hokwe nan kriypakriy.
 - Hno yor mokwe piap, ya eyn-aw krikri. Sokukwe ma lon sawkriy yor hok non.
 - Nan kriypakriy yor hokwe hno non-wawwaw yor ke mon piapay. Seyr hunkiaw kokwe seyr piap lwak.
 2. Hunkwe lorionay kow yor ke liy liaup:
 - Unsaney hne ma mon piapay se lorionay kow. Sawk hom hne penkin mon piapay me, hunkwe hme liy mekow nonkway.
 - Hunkwe lorionay kow ankin, hunkwe kwa nuw-orionay ha lowpway. Hunkwe peie ma-nanpanan o.
 - Suw hunkwe low lopa lwak. Hno owh hokwe low hei lopa, hno uron hokwe kar ley. Hunkwe honsi lopa.

6 Meyk, hrom uwrsa har me lorionay kow e ma me hokwe senkin:



- 6.1 God hiykwe hreme po lorionay kow. Kolosi 3:12-17 ke kwa lira mesor.
- 6.2 Hunkwe mey-uwr lorionay kow yor lopa so ok ke kwa lira mesor. Matyu 18:21-35.
- King hiykwe mey-uwr mein-own milion kina non se me sasay pa, mein-own hyo me masahre kow e. Korey.
 - Sawk mey-uwr sohokwe mey-uwr hyo meyki ko se uron lowk pa, korey. Hiykwe mey-uwr meyki ko se me sasay, hyo mein-own paswaw-ney ke masahre kow e.
- 6.3 Hromkwe mey non, seyr hromkwe ok ipey-ar uwrsa har me mesor kow ey non: 2 Korin 5:16-20
- God hiykwe hreme meha, uwrsa har me hyo ok me mesor kow e (ves 20).
 - God so ok kokwe senkin: Yerki, God hiy uwrsa me nion uron kamon-aw non-wak ey hokwe, papo kampi kow. Seyr, yerki, uwrsa homkiaw-ayay-aw uron kamon-aw lwak ey hokwe, seyr liyliy-aw (ves 18-19).

- 6.4 Unsaney homkwe hne me pa ka lwak, seyr hunkwe heyn lopa kwa lwak. Filipai 2:14-16a mon kokwe Pol hiykwe senkin me, 'Suw hunkwe God so su lwayr ok kokwe hme liy mesor kow'.

7 Hunkwe unsaney prueyn se mon piapay ankin, hunkwe enkin kwa lon:

- 7.1 Peyrmon-ar hokwe hunkwe God se kwa mesopok.
- 7.2 Weyn piap hwon ma meio ke God se sor-ar sor-ar kwa mekow.
- 7.3 Unsaney, hwon ma mon piapay so owh mon ley nok, hye nion non-ohruw. Weyn piap hwon ma meio ke peie nak-me neianei nok o, seyr hunkiaw-ayay peie nak-ian kreakre hiy-orok o. Weyn piap hom hne ma meio hokwe, suw hno ok-mawk peie lwak o. Matyu 5:23-24 o, Matyu 7:3-5 o, ok seme kwa lira mesor.
- 7.4 Unsaney, hwon ma mon piapay sohiy se nion kwa manon-mon popriy. Hunkwe hyo omeme me yokun lopriy ankin, hunkwe kwa ma-kow. Luk 19:8-9 ke kwa lira mesor.
- 7.5 Hunkwe seyr hno yor piap ke hunkiaw-ayay kwa lorionay kow. Seyr unsaney prueyn sohiy hne mon piapay seyn, hunkwe hye kwa lorionay kow. Unsaney hne nion aw ma lono sohiy hne lorionay kow pa lwak ankin, suw hno heyn korey. Hunkwe hiy hne lorionay kow e liy me-sasay ley. Hiykwe lorionay kow ankin, se sehe, hiykwe lorionay kow pa lwak ankin, se sehe. Hunkwe hunkiaw penkin lon e liaup e, sohiykwaw. Sawk hunkwe unsaney prueyn sohiy se nion aymarowh-aw non-wak e kwa manon-mon popriy. Rom 12:18 ke kwa lira mesor.

8 Sios hokwe low har non lwak ankin, hunkwe enkin kwa lon:

- 8.1 Hunkiaw-ayay kwa mesopok, hno uron arian hokwe seyr yor piap non senaw lwak. Enekwei har mokwe hromkwe yor piap hromo uron arian mon ma lwak mokwe lira soway soway popriy nonkway pey. Sawk hrom uwrsa mo yor piap me lira me hokwe, hremekwe honon honon seyn lwak pey. Sawk hromkiaw kokwe seyr yor piap lopa korey, peyr hromkwe hromo yor piap arian me kwa mon popriy pie. Matyu 7:3-5 ke kwa lira mesor
- 8.2 Hmo sios mon kokwe kristen prueyn prueyn-aw homkwe yor piap meio ankin, homkwe enkin kwa lon:
 - (1) Unsaney sohiy so owh mon ley nok, yor hiy ma meio sokwe hye nion non-ohruw. Matyu 18:15 ke kwa lira mesor.
 - (2) Sa unsaney sohokwe lonuayk pa lwak ankin, hunkwe unsaney prueyn, seyr prueys me kwa me huonok. Sa hom lowpwarowp unsaney sohiy so owh mon ma-ley nok, hye nion non-ohruw. Matyu 18:16 ke kwa lira mesor.
 - (3) Sa unsaney sohokwe nuw-onuayk pa lwak ankin, hunkwe sios mo uwrsa me kwa lohruw. Sei, sa hom ka lohruw, unsaney sehe kokwe. Matyu 18:17 ke kwa lira mesor.
 - (4) Sa unsaney sohokwe nuw-onuayk pa lwak ankin, unsaney sohokwe God se nan kiykiy-ay pa ma lwak se hieyn kwa lira. Sawk hunkwe hye uron-pi ko-ar lwak nonaw kwa lwak. Hakamay Jisas hiykwe senkin me, hromo awia mokwe hromkwe God se hiy-mesopok e. Matyu 5:44-46 ke kwa lira mesor.

9 Sios har homkwe sios har me nion low har non Iwak ankin, homkwe enkin kwa lon: Efesus 4:11-16 ke kwa lira mesor.

- 9.1 Krais hiykwe owhi kamonaw. Owhi sokukwe hyo sios hiy non. Nonkumey mon kokwe uwru kamonaw Iwak ey. Rom 12:5 o, 1 Korin 12:12-13 o, Efesus 4:4 o, ok seme kwa lira mesor.
- 9.2 Hunkwe owhnan kamon okwe kwa lira: hunkwe hno sune ke mon piapay. Sa hno sune kokwe ya non aiopey hay nak-oum. Sa hunkwe senkin liy me ley, "Hunkwe sune piaparaw." Hwon senkin ma me hokwe, hno sune hokwe yaprue liy Iwak ley, korey. Hno sune hok yaprue Iwak ey hokwe, hunkiaw ma mon mnowmnow popriy hiykaw. Low har paswaw-ney mokwe, yier-ok aiopey hay peie lon seyrpaseyr ohruwa o. Sa hromkwe Kristen-wayh se nion uron kamonaw non-wak pa Iwak ankin, hromkwe God so hiy-me now-anow ok Rom 14:1 - 15:7 serey ma Iwak ke kwa lira mesor. Sa unsaney prueyn so yor God so me kupaku-ok ke kamaun sow ankin, hromkwe Matyu 18:15-17 kwa pyay. Yor piap senkin somokwe Rom 14 ke peie pyay o.
(Rom 14:1 - 15:7 o, Matyu 18:15-17 o, ok seme kwa lira mesor.)
- 9.3 Sios mon kokwe hromkwe sios har me ok piap senaw lohruw, payhokuaw hmo kampueys yor mokwe irweyk. Seyr hromkwe Kristen-wayh me senkin senaw lon. Hromkwe senkin senaw me, "Hunkwe yerki piap mon ley", seyr "Hunkwe akiaup." Hromkwe senkin peie lon o, sawk hromkwe hme hiymon e, hromo sune piap ke ma hiymon senkin.
- 9.4 Krais so owhi, sios, hokwe aw aiopey hay lok, hrom enkin ma lon somokwe: Hromkwe sios har o, Kristen wayh har o, hme uron lowk pey, hrom ok piap enkin ma lohruw omokwe, "Homkwe yerki piap mon ley", seyr "Hunkwe akiaup." Hromkwe senkin lira, sios har homkwe sios har me nion non-onseyrpaseyr, sa uwsa sios kamon ko homkwe hmo sios me lokriy hain nok, sios irweyk mon ma-lyawriy ok. Hromkwe senkin peie lon o. Sawk hromkwe senkin seme lon, payhokuaw hromkwe aryar yor non. (Poup hiykwe nonkumey se sehe lokriy hain, payhokuaw hiykwe aryar.) Kristen-wayh hom homkiaw-ayay ma mon piapay omokwe yaprue korey. Sios irweyk irweyk mo non-wawwaw yor hom piap ma Iwak ohom seyn, somokwe yaprue korey. Homkwe lorionay kow yor o, uron kamonaw manon-wak yor o, seme liaup pey.

Hou namon namon lokima okima ha nok, liwak-sir ohruw-a:

Hromkwe penkin lon a? Hromkwe lorionay kow yor o, uron kamonaw manon-wak yor o, yerki penkin non hiymon ey so? Hromkwe Krais so owhi hok kamonaw ma-Iwak ey hokwe, penkin hiymon ey so?

Mesopok omokwe uwsa prueyn prueyn-aw homkiaw-ayay kwa mesopok:

1. Hno uron hokwe nan kriypakriy yor non pankaw kiy-wak o?
2. Hunkwe unsaney har me lorionay kow mey non pankaw kiy-wak o?
3. Hunkwe unsaney har me nion uron kamonaw manon-wak mey non pankaw kiy-wak o?
4. Hai, suw hunkwe penkin meio a?
5. Hunkwe unsaney prueyn se kasaw pankaw kiy-hohuaw o?
6. Kwa liwak nan sakon kawk, hunkwe unsaney sehe penkin lorionay kow ey so?

LESON 18: Yerki ipey-aio o, ney o, hom kristen me hieyn ma lwayr hom non

Uron ipey-ar: Leson erey mon kokwe hromkwe Kristen-uwrsa hom hmo a me hiymon yor me lohruw ey. Kristen-uwrsa hom hmo a mon God so ok ke peyrhawk kekie ey hokwe ipey-ar. Uwr o, sah o, hohkwe mey ipey-ar non. Hromkwe God so ok, hok ok-ku sokwe ma lohruw me lira ey. Mey uwrku saku hom homkiaw-ayay hiymon ey kokwe a mon lwak. Homkwe homkiaw-ayay a mon hiy-me kraipakrai, Kristen mo lanio yor me. Sa prueyn prueyn-aw mo God se nion non-wawwaw yor mokwe ihey-ar liy lwak. Sohokwe God so uron kristen-a kamon kamon-aw me ma nanpanan hiy non.

1 Kristen-a:


- 1.1 Serey mon kokwe Hakamay Jisas hiykwe a so ompok mon lwak.
- 1.2 A sohokwe homkiaw-ayay a mon yaprue non-wawwaw ey hokwe mey kraiar meio.
- 1.3 A sohokwe ipey-aio leys hohkwe owhnan me hieyn lwak. Hohkwe God so ok hoh ma nanpanan kiykiy-ay me mesair kow.
- 1.4 Homkiaw-aw a mon non-wawwaw yor hokwe God hiy penkin God lwak e, seme kwa mesair kow.

2 Uwrsa prueyn prueyn-aw a mon ma lwak mokwe, God hiykwe mey po kow (Owhnan aiopey hay 18a ke kwa lira):



- 2.1 Uwr-om, homkwe hmo sa me uron-pi ko-ar kwa lwak, Krais hiy sios se uron-pi ko-ar ma lwak senkin. Efesus 5:25 ke kwa lira mesor.
- 2.2 Ipey-aio om, homkwe hmo ney me ok meyk lopa non me peie me-hohuaw o, sawk hom ney mo uron me mon piapay lak. Kolosi 3:21 o, Efesus 6:4 o, seme kwa lira mesor.
- 2.3 Sa-om, homkwe hmo uwr me kwa mon komnow komnow, seyr hme nion uron kamonaw kwa lwak. Efesus 5:22 ke kwa lira mesor.
- 2.4 Ney-om, homkwe hmo ipey-aio mo ok me kwa lonuayk me, yor

Poster 18a
Copyright © 2000-2007 The SALT Project. All Rights Reserved.
Homkiaw-aw a mon non-wawwaw yor hokwe God hiy penkin God lwak e, seme kwa mesair kow.

*Uwr-om, homkwe hmo sa me uron-pi ko-ar kwa lwak,
Krais hiy sios se uron-pi ko-ar ma lwak senkin. Efesus 5:25
Sa-om, homkwe hmo uwr me kwa mon komnow komnow,
seyr hme nion uron kamonaw kwa lwak. Efesus 5:22*



Ney homkwe uron-pi ko-ar yor kokwe hmo a arian mon ka lira. Yerki sohiy non kokwe, homkwe God so uron-pi ko-ar ke mon sorasor.



*Ipey-aio om, homkwe hmo ney me ok meyk lopa non me peie me-hohuaw o, sawk hom ney mo uron me mon piapay lak.
Kolosi 3:21*

Aio ki ko homkwe God so owhnan ke kwa pyay. Homkwe yerki, hmo ney me uron-pi ko-ar lwak ey mokwe, nonkway kwa lwak popriy.





sokukwe yaprue. Payhokuaw, Hakamay hiykwe krai hme hiy-wayr ira ey hokwe, hmo ipey-aio me po kow. Efesus 6:1 o, Kolosi 3:20 o, seme kwa lira mesor.

3 Mey, Kristen-a hiy meio ey hom non

- 3.1 Aio ki ko homkwe God so owhnan ke kwa pyay. Homkwe yerki, hmo ney me uron-pi ko-ar lwak ey mokwe, nonkway kwa lwak popriy.
- 3.2 Uwrsa Kristen-a ko homkwe yerki God so uron-pi ko-ar ke meio mesair kow ey mokwe nonkway kwa lwak. Ney homkwe mo yerki sohiy non mon sorasor. 2 Timoti 1:5 ke kwa lira mesor.

4 Ipey o, aio o, hoho mey iha sirom pruw non (Owhnan aiopey hay 18b):

- 4.1 Ipey-aio leys hoh hohkiaw-ayay uron-pi ko-ar ma lwak mokwe, ney me senkin mesair kow, God hiykwe hme uron-pi ko-ar nuw-wak. Ipey-aio o, ney o, homkwe Krais o, sios o, seme mesair kow.
- 4.2 Mey lowpwarowp, hwon ma meio mokwe owhnan yaprue kwa mesair kow. Ney homkwe omeme hom ma lira yerki non mon sorasor.
- 4.3 Weypaweyn, hwon hno a mon ma mesair kow sokukwe God so uru se ka way nonwey ie.
- 4.4 Hno ney me uron-pi ko-ar kwa lwak.
- 4.5 Ok, hwon ma me mokwe hunkwe kwa nanpanan popriy. Hno ok mokwe yaprue ka lwoun, sa uwrsa har a ko me ka hiymon kraipakrai.
- 4.6 Hno ney so God se nanpanan kiykiy-ay yor o, God so ok ke pyay yor o, seme kwa hiymon meio nonay nonay ie.

Ipey o, aio o, hoho mey iha sirom pruw non	
1  Ipey-aio leys hoh hohkiaw-ayay uron-pi ko-ar ma lwak mokwe, ney me senkin mesair kow, God hiykwe hme uron-pi ko-ar nuw-wak. <i>Ipey-aio o, ney o, homkwe Krais o, sios o, seme mesair kow.</i>	2  Mey lowpwarowp, hwon ma meio mokwe owhnan yaprue kwa mesair kow. <i>Ney homkwe omeme hom ma lira yerki non mon sorasor.</i>
3  Weypaweyn, hwon hno a mon ma mesair kow sokukwe God so uru se ka way nonwey ie. <i>God so uron-pi ko-ar hokwe uwrsa me kwa mesair kow.</i>	4  Hno ney me uron-pi ko-ar kwa lwak.
5  Ok, hwon ma me mokwe hunkwe kwa nanpanan popriy. <i>Hno ok mokwe yaprue ka lwoun, sa uwrsa har a ko me ka hiymon kraipakrai.</i>	6  Hno ney so God se nanpanan kiykiy-ay yor ke kwa hiymon meio nonay nonay ie. <i>Ney me kokwe God so okpey me kwa hiy-ira mesor. Ney homkwe hno mesopok yor ke ka lira. Homkiaw-ayay prueyn prueyn-aw me God se hiy-mesopok. Hno ney mo uron o, weyn o, seme kwa hiymon sorasor kraipakrai.</i>

- Ney homkwe hno enekwei God se a mon ma mesopok mokwe ka lira. Sa homkwe liy pyay.
- Lowpwarowp a mon ma lwak homkwe hmo ayay la enekwei mokwe God se kwa mesopok. Enekwei kamon hokwe prueyn hiy mesopok, sei, enekwei kamon hokwe sawk prueyn hiy, senkinaw-aw.
- God so ok ke ney me hiy-ira mesor nok, okpey God so ok mon ma lwak seme ney me hiy-mesor monsorasor.
- Homkiaw-ayay prueyn prueyn-aw me God se hiy-mesopok.
- Hno enekwei kraiar mokwe hno ney mo uron o, weyn o, seme kwa hiymon sorasor kraipakrai.

5 Kristen-a hokwe meyk ipey-ar non:

- 5.1 Ney homkwe God so yor mokwe hmo a arian mon ka mon-sorasor.
- 5.2 Ney homkwe hmo lokihre-ir yor o, hmo weynpaweyn o, hmo a mon meio pie, ipan ipan-aw lon ey lopa lwak ey hokwe. Sa homkwe a mon liy meio hrekawk hrekawk.
- 5.3 Sohokwe Krais o, sios o, hoho non-wawwaw yor ke mesair kow.
- 5.4 Kristen-a homkwe sios se mon kraipakrai.
- 5.5 Kristen-a yaprue hiykwe uwrsa hmo ohriar ma lwayr me hiymon.

6 Uwr o, sah o, hoho uron ko ipey-ar o, hoho mey o:

6.1 *Uwr so mey:*

- Uwr hiykwe a so makwey, Krais hiy sios so makwey ma lwak senkin. Efesus 5:23 ke kwa lira mesor.
- Hiykwe sah ke uron-pi ko-ar kwa lwak, seyr sah ke mey kwa meio kow. Efesus 5:25, 28-29 o, Kolosi 3:19 o, seme kwa lira mesor.
- Hiykwe sah ke kwa mon komnow komnow. 1 Pita 3:7 ke kwa lira mesor.

6.2 *Sah ko mey:*

- Sa hokwe uruh se kwa mon komnow komnow. Efesus 5:22 o, Kolosi 3:18 o, seme kwa lira mesor.
- Uruh hiy makwey ma lwak hokwe, hokwe uron kamonaw kwa lwak. Efesus 5:22 o, Kolosi 3:18 o, seme kwa lira mesor.

6.3 *Hrom Kristen ma lwak mokwe, hromkwe wayh-wayh mo ouon mon kwa lwak.*

Efesus 5:21 o, Kolosi 3:12-17 o, seme kwa lira mesor.

7 Ipey-aio mo mey (God se mon komnow komnow yor o, nan kiykiy-ay yor o): 2 Timoti 1:5

- 7.1 Ipey-aio homkwe a so peymawlk liarok uwrsa.
- 7.2 Hromkwe hromo ney mo
 - Owhi
 - Makworom
 - Niohney, seme kwa hiy-wayr ira kraipakrai.
- 7.3 Hromkwe ney me senkin hiymon sorasor e, homkwe seyr mey non.
 - Ney homkwe lonuayk me ankin, omeme yaprue hom lousne, seyr ipey-aio homkwe hmekwe sankaw sosor iwak lopa.
 - Sawk ney homkwe lonuayk me pa lwak ankin, omeme yaprue hom lousne lopa, seyr hmekwe ipan ipan-aw liy lon ha ley.
- 7.4 Hromkwe hromo ney me hiymon sorasor e, seyr ipan ipan-aw peie lon o. Hrom senkin lon ankin, hromkwe God so yor ke pyay. God hiykwe hyo uwrsa mokwe mo hiymon sorasor, seyr ipan ipan-aw seyn lon pey. Payhokuaw, hiykwe hme uron-pi ko-ar nuw-wak. Hibru 12:5-11 ke kwa lira mesor.

LESON 19: Hwon God so ok mesor kow ankin, hunkwe enkin kwa ionhan koruay

Uron ipey-ar: Hromkwe God so ok sor kow e mon ankin, hromkwe yerki ok me liwak ira koruay ey o, sor kow ey o, seme kwa nuw-monsorasor popriy. Sa ok, hwon ma mesor somokwe uwrsa homkwe yaprue ka lonuayk, seyr honon honon lwak lopa, seyr mey yaprue uwrsa mo uron mon meio kwawk. Leson erey mon kokwe hromkwe God so ok ko kopi kamon ko meyk-ar ke hiy-me sorasor yerki o, nonkway popriy yerki o, seme hiymon sorasor.

1 Ok me liwak ira koruay yerki:

1.1 God se kwa mesopok, sa hiykwe hne liy mesair kow, yerki mey sokwe meio ey hokwe. Seyr God se kwa mesopok, sa hiykwe hne kokwe mawkhow ihey-ar ka kow. 2 Timoti 2:2 o, Sam 127:1-2 o, seme kwa lira mesor.

1.2 Hunkwe God so ok sor e mon ankin, hunkwe eme kwa nanpanan:

- Uwrsa enekwei sohiy sok ma hokruw me kwa nanpanan
- Hunkwe ok yaprue uwrsa seme hiymon ey me kwa lahan iaup koruay
- Hunkwe enekwei sohokwe ayay penkin hom lousne e nanpanan o?

1.3 God so ok kopi kamon kwa liaup:

- 1.3.1 Ok sokwe kwa liwak ira nanpanan
- 1.3.2 Ok-ku ipey-ar, ok kopi serey ma lwak me kwa mey-a-mey.
- 1.3.3 Ok-ku ipey-ar, ok kopi serey peyrmawk ma liarok ke kwa pawk.
- 1.3.4 Ok kopi sokukwe hremekwe unsaney omokwe penkin hiymon sorasor o?
 - God se kokwe penkin me o?
 - Hakamay Jisas se kokwe penkin me o?
 - Niohney Pekneyweys se kokwe penkin me o?
- 1.3.5 Hiy-me sorasor ok kwa pawk, ok kopi serey mon.
- 1.3.6 Ok-loray kwa pawk, ok kopi serey mon.
- 1.3.7 Ok kopi serey mon kokwe hnekwe payme me-sous kupaku mo?
- 1.3.8 God hiy hne ok kopi serey penkin me me, seme kwa me-sorasor.
- 1.3.9 Meyki-ar hokwe hwon ok kopi serey mon pay me mon sorasor me, seme kwa me sorasor. Sei, hunkwe mon sorasor somokwe hno lwayr-yor mon yerki penkin non nak-meio ey mo, seme kwa nak-me sorasor popriy.

1.4 Ok mesor enekwei hokwe hunkwe omeme har kwa nak-onhan koruay.

- Heyow unsaney mo uron me mon sian ey me kwa nak-meio.
Yerki sohiy non kokwe hunkwe ok hwon ma hiymon sorasor sokukwe yaprue liy nuw-mesor popriy. (**Owhnan:** Okpey, uwrsa ok kopi serey ma lwak me meio lunlun, owhnan aiopey hay, omeme har.)
- Omeme hwon hiymon sorasor ey me lonhan koruay.
(Owhnan aiopey hay, heyow omeme.)

**Hwon God so ok mesor kow ankin, hunkwe
enkin kwa lonhan koruay** 2 Timoti 2:2

God so ok kopi ke kwa liwak ira nanpanan

Mesopok Ihaiha-aw:

1. Ok-ku ipey-ar, ok kopi serey ma lwak me kwa pawk.
2. Ok kopi serey mon kokwe God Aio o, Ney o, Niohney Pekney-weys o, hreme penkin hiymon-sor-a-sor o?
3. Ok kopi sokukwe hreme pay me mesous kupaku o, seyr pay me me-loray o, seyr pay me hiy-me sorasor o?
4. Ok kopi sokukwe hremekwe penkin lon e me o?


Ok hwon mesor ey kokwe enkin ka lwak

1. Peyrmawk ok
2. Uron ipey-ar mokwe kwa kekie sor (Sankaw: 2-5)
3. Uron ipey-ar kamon kamon-aw mokwe kwa nuw-me-sorasor popriy. Omeme hwon ma lonhan koruay me kwa nak-meio
4. Ok ko uron ipey-ar se kwa ma-me, seyr uwrsa me kwa hiy-me now-a-now, ok me pyay e.

Peyrmawk ok

1. Uron ipey-ar peyr-ar ko - owhnan
2. Uron ipey-ar kreys ko - owhnan
3. Uron ipey-ar krompri ko - owhnan

**Ok kopi sohok ko uron
ipey-ar**



2 Ok hwon mesor ey kokwe enkin ka lwak:

- 2.1 Peyrmawk ok: Uron peyrmawk ma lousne sa-ousne pie me, kwa mesor kumay popriy.
- 2.2 Uron ipey-ar mokwe kwa kekie sor (Hno ok ko uron ipey-ar mokwe, sankaw-aw ka lwak, kreys, krompri, iha-ih-a-aw. Sawk iha sirom ko eir mon peie ma-nak-sor o.)
- 2.3 Uron ipey-ar kamon kamon-aw mokwe hunkwe yaprue kwa nuw-mesorasor popriy. Omeme hwon heyow nak-onkuseyn ey, hwon ma lonhan koruay seme kwa nak-meio. (**Owhnan:** okpey, omeme har)
- 2.4 Ok ke sor sompay ha ey hokwe, ok kopi hwon ma mesor sohok ko uron ipey-ar se kwa mesor. Seyr uwrsa mo lwayr yor mon mey penkin nak-meio ey me nak-mesorasor.

3 Ok kokwe hunkwe enkin kwa mesor:

- 3.1 Uron ipey-ar mo ok-ku, hwon uwrsa me mesor kow ey me kwa mekow nonkway pie.
- 3.2 Uron ipey-ar mokwe hunkwe yerki irweyk irweyk non kwa mesorasor.
- 3.3 Ok, hwon ma mesor ke kwa mesopok sopok, hunkwe yaprue po mesor pak?
- 3.4 Kwa liwak sir sor. Uwrsa hom pay me monsorasor e seme kwa nak-mesair kow. Seyr nonkway iwon somokwe, homkwe hmo lwayr yor mon ka nak-meio.
- 3.5 Ok ko uron ipey-ar ke kwa ma-me. Mesopok me kwa ma-sahre onuayk me.